

蘊情閣詩集



蘊懔閣詩集卷第七

鎮洋 盛大士 子履

乙亥

人日後三日汪厚夫侍御與耐山司馬

 招同

楊叔温明經 雲璈 畢季瑜彭甘亭集飲小瑯嬛分

得五言古體一首限鳥字

西城小瑯嬛十笏遠塵擾賢主合兩美照瞻明月皦咬春

開辛盤掃徑讌朋好初治茗盞潔旋鬪詩牌巧寒英透檐

角香氣入清醪干觴酒政嚴一字枯腸攪欲問太元奇類

然玉山倒 是日主賓六人各舉觴政 主人勸客醉巨觥尙

嫌小丁丁滴殘漏客既醉且飽年來荒江濱寂寞歡場少

我從海虞歸忽忽逼歲杪積雪門不開孤眠雲獨抱况逢
歲告稔粒米連城寶集澤嗷哀鴻啄桑憫黃鳥酌酒告天
公願爲蒼生禱春陽布醴澤比戶樂康保犂牡速親舊椒
糝壽胡考庶幾懽會暢不用憂心悄卽今議賑米聊爾濟
饑殍握粟同涓流何以掄枯槁澆愁傾濁醪中夜意如擣
頗幸勝侶集擊鉢脫新藁敦槃附滕薛寒瘦愧郊島東風
湖上客夢逐煙螺繞潭水別汪倫青山懷謝朓美人碧雲
端相思贈芳艸歸期盼寒食鶯花猶未老重斟綠蟻杯飽
看春山曉

新正十日與耐山招同叔溫靜山甘亭子履小飲分
韻得客字

汪彥博

簷禽啄雪噤寒劇日暮敲門接巾烏簾依病萼故遲
遲酒入枯腸先拍拍且喜辛盤得韭芽尙儲臘味饕
羊炙平生意氣交勿溫要識寡尤在先擇季瑜眼底
作阮狂叔溫胷中有嵇癖子履羞爲毛遂雖甘亭笑
却虞卿璧驚換新年呼舊侶語軟意真見肝鬲世間
痛飲屬吾曹拚與梅仙分半席短檠燭花醉眼亂留
擘黃柑話疇昔往夢僧樓飯後鐘浪游塵海生前屐
名園綠水久荒蕪賸有城南鶴一隻南園老梅名滄
一隻瘦鶴舞
江風月不買錢會合休輕須愛惜君言惡歲賤了男
那敢酣歌事觴醪我言曠達晉高流日坐愁城復何

益願將此酒變陽和大地回春救流瘡諸君秀句照
江表坐此飢寒豈詩厄自古酸生一束書不敵田翁
十斛麥驥足悲鳴鹽坂間鳳腸餓想琅玕食詩壇喚
起故將軍怯挽強弓棄長戟忽報銜枚筆陣來夜奪
崑侖出夸客是日甘亭似少吟與故示怯於人而詩先出手殊不測也一鳥先嘯
百鳥瘖莫怪東風苦催迫新詩要寫上元燈休待餒
香與粥白諸君昨云詩成以寒食爲約故迫之

虞山晚發將之浙西丁明經日生昆弟招同吳茂

才卓信張明經鐸餞余於西城山墅詩以留別

十日住虞山遍訪山中友探罷招真古治梅春風挂席錢
塘口錢塘花發江流香雲間霧閣參差望飛鳥片帆縈客

思故人明月想容光屈指歸艍寒食節無過三旬兩旬別
又恐行蹤預定難未免江鴻滯泥雪二丁才調擅風流攜
酒邀朋洗客愁鐙下淺紅蘭炬剪花前大白玉醅浮分曹
射覆懽騰沸笑譚共帶煙霞氣主人已見客顏酡只道今
宵醉還未酒盡更闌各黯然一聲欵乃渡頭船綠蕪遠處
漁謳起夢入西湖雨後天

過龐山湖次平望驛

一水明于鏡輕帆不暫停湖開遠山翠天入洞庭青驛樹
花環岼漁莊鷺浴汀平分吳越秀曉氣望清泠

曉雨初霽望吳中諸山

綠蕪散宿雨翠微入遐覽湖平沙岼曲霧濃雲岫澹羣螺

聚成團一手或可擘橋影惜半遮叢林又交掩若非朝霞
升何時掃豔黥今曉盪春渚空青落數點蒼茫闔城恃
此江山險破楚失吞越蘇臺日色慘胥江嗚咽水激怒瀝
肝膽風聲聒耳來醉嘯發百感

鷺脰湖舟中偶成

水榭牕櫺面面通花光透出淺深紅吳江第四橋邊望春
在濃雲細雨中

鷓鴣雙飛掠夕波蘋洲沙暖暗浮螺儂家新種湖邊柳綠
借桑陰一半多

由鷺脰湖過爛溪塘薄暮阻雨

炊煙一縷起郵莊處處林鳩喚侶忙燈下癯顏看獨笑春

來詩夢亦生香鄰舟有伴鄉音熟溪閣誰家醉語狂聽得
篷牕聲浙瀝攪人愁緒十分長

花舫曲

蘭舟曉盪湖心綠風花雨花斷還續別有春生水面香嫣
紅影照鴛鴦浴吳娃十五嬌可憐越羅衫子花光鮮菱開
花拂鬢雲亂輕寒不散螺窗煙折得花枝問誰寄花亦憐
人解人意儂替花憐儂自憐春來又恐春歸易湖邊有客
駐征橈詩魂似逐花魂飄春城孤負看花約愁水愁風暮
復朝

步雲橋沽酒

小帘青颭一帆煙清若空真色味鮮

清若空酒名見武林遺事竹垞詩荆南豫

北闕新釀不比
吾鄉清若空
醉立花陰衫落翠步虛疑是碧雲天

竹素園次陸萊臧孝廉

我嵩

題壁韻

園花疑識面笑引客來游春澗靜流碧竹風涼若秋旅情
餘燕壘詩意落魚鉤欲覓玉泉寺重停湖上舟

玉泉寺觀魚

虛室纖埃靜招提古玉泉無窮濠上樂小有水中天徑入
雲根曲池浮塔影圓漢陰機自息隨處可忘筌

同何孝廉

枚

何茂才

正機

登吳山絕頂望錢塘江

形勝扼全越江山出霸才六鼇吹浪起萬馬射潮來虛白
開詩界空青落酒杯老松蟠翠鬣飛上大觀臺

孤山觀梅過放鶴亭訪和靖先生墓

山腰梅花開山頂梅花落巢居閣外夕陽亭處士當年曾
放鶴蕪碑卧石磴蘿逕盤孤墳嶺頭雲接湖上雲玉光十
丈吹氤氲此花萬古冰雪心祇許孤鶴相招尋逋仙恥作
大隱客與爾高卧深山深舉朝不分忠與佞先生入山計
乃定嶺上梅花似白雲孤山不作終南徑橫斜疎影記依
稀羽筆翩躚有夢歸愧彼鐘山草堂客月明蕙帳鶴孤飛

謁岳忠武王墓

南渡朝廷小偷安棄汴京兩宮讎未復三字獄先成江表
新遷社中原正用兵相州興義旅鄂國著威名鐵騎嘶風
健牙旗望氣驚嚴關開戰壘細柳整軍營溫嶠登壇誓劉
琨拜表迎控鞍思敵愾握節命專征醉待黃龍酒書邀白

蘇軾詩集卷之一
五
馬盟一朝誅上將萬里壞長城玉弩懸空壁金牌下九閔
地輿臣構獻天塹僞齊爭事業銷磨盡英雄生死輕丹忱
原磊落寃案不分明此後甘銜璧憑誰共請纓枕戈無銳
卒蹈海有遺氓化鶴魂留恨騎驢氣不平北雞潛縛虎石
馬怒奔鯨殿上瞻旒佩階前跪裸裎湖山仍秀鬱草木亦
精誠俎豆供新奠衣冠拜舊塋棲霞嶺畔望過客淚縱橫
西湖寒食
山雲圍幕水生鱗客裏鶯花爛漫新莫折蘇堤堤畔柳綠
煙痕似故園春
窈窕牕開鬪麗娟六銖衣薄卸吳縣香車蘇小墳前過可
有青驄控玉鞭

樵歌隱約起邨扉墟里孤煙隔翠微日暮西泠橋畔望紙
錢灰並紙鳶飛

智果新泉石罅流坡僊詩夢憶黃州僧雖不解談禪趣也
試頭綱瀹小甌

南屏遠近現樓臺小築茆庵舊姓雷塔影外湖霞未落月
光已進裏湖來

瓊瓏石筍瀉珠泉山墅人家小有天籬外桑田纔過雨禁
煙時節自生煙

水面虹梁跨玉腰有人湖舫弄清簫梨花一樹香雲密殘
雪三分夜未消

沿堤聽徹賣餠聲芳草生時客感生夕照湖心亭一角落

紅深處暮雲平

同作

青浦 陸我嵩

吳綿初卸嫩寒天燕子風微送畫船描出六橋山似
黛西湖今日也藏煙

白隄新綠長蘼蕪前度裙腰路有無十里梨花明似
雪殘香落遍酒家壚

腸斷西泠橋畔行碧桃瘞後野棠生蘇孃古墓無人
掃松栢年年作雨聲

苔井新淘茗約圓細炊槐火不談禪黃州詩夢千年
冷賸有煙迷智果泉

飢盤香過湧金門莞蘚荒原有酒痕纔喜澆山愁潑

火鷓鴣啼雨水邊邨

賣杏街頭濕曉雲千家插柳話紛紛嫩條簪上吳孃

髻還比門前綠幾分

杭俗是日女人以
柳梢簪于頭上

山郭嬉春未縛滕晴絲窄地點衣稜紙錢零亂隨風
舞牽上黃妃塔一層

青袍吟倦不勝情夢到家山正聽鶯愁賦粥香餠白
句三年客裏過清明

送吳農部 頤之金華

垂老一官貧江湖作散人綠波吳下客芳艸越中春宦海
心情拙書生面目真惟看華頂月猶夢鳳池濱

西泠署齋習射呈何觀察茂軒先生

射圃榛蕪闢飛沙響角弓隼旗光掣電雕帳氣吞虹健鶻
高翔翼飢鷹陡墜空一彎開瞰月四座扇春風劍燦霜花
白鈴排繡簇紅的看分豕豹發必中豨豨藝共詩書習功
須巧力充精心求貫蝨妙技陋雕蟲選士游鄉校興賢試
澤宮賓僚爭亦讓升降禮先崇沒羽雄心托懸弧壯志同
反求嗤倖獲慎勿負初衷

于忠肅公祠

瓦刺圖南牧鑿輿竟北轅誰安明社稷再造舊乾坤慈詔
深宮出嚴兵近甸屯貂璫除醜族龍轡逐賢籓少保經綸
茂中朝德望尊行營推鄭畋勸駕倡劉琨赤手辰謨定丹
衷乙夜捫夷吾賴瑕呂叔武得元咍屬幕吹笳急蘆溝問

渡喧壤雲飛破堞苦霧壓頽垣挾質軍傳箭要盟騎帶鞬
城孤糧漸竭食少事偏煩艸檄青鐙夜封章碧血痕議和
排眾策握算救盤根陶侃新移節桓虔外結援捷書看速
奏歲幣不須論出塞千巖雪還宮五綵旛君王重告廟宵
小倖邀恩懷愍前車覆徽欽信史存如何忘大辱此案忽
輕翻待漏遲趨陛鳴鈺驟奪門元勳遭慘戮萬口痛奇冤
偉烈輝終古高皇鑒九原石人謀暗洩金齒氣潛吞雨帝
彫松栝山靈泣芷蓀墓田盈宿莽祠宇奠忠魂霞嶺嵐光
合煙林野色昏平臯愁唳鶴古洞聽呼猿詞客搽蕪謁巫
陽降夕闈西冷橋下水哀響瀉潺湲

章少尹

寶蓮

陸孝廉

我嵩

同遊雲林寺用竹垞韻

茆檐人語入翠微竹陰綠捎郵桁衣卧澗老樹壓亂石倒
挾巖溜枝頭飛三人同行約四里冷泉亭北開僧扉到此
一洗萬緣淨心與鷗鳥同忘機

有目須辨山色真有脚不憚陟險頻狂呼老猿猿不應洞
有石虎貪窺人下山渴欲索米汁佛戒未破僧先嗔龕中
彌勒拱手笑山厨已熟湖田芹

坐冷泉亭觀飛來峯口占二絕句

山亭六月秋靜聽泉聲幽吹雪落天外白雲凝不流
竺國小靈鷲飛作湖上峯天青雲氣濕洗出金芙蓉

呼猿洞

幽篁生夕風臨澗發長嘯雲暗洞猿啼月明山鬼笑

韜光寺聯句

杖策韜光徑

大

招提別有春茶瓜聯不速

章寶蓮

鐘鉢喜相

親石氣寒侵骨

陸我嵩

雲衣翠滿身引泉蛇卧笕

大攀磴蟻

行人何點閒停屣

寶蓮

林宗笑折巾虛巖松答籟

我嵩破竈籜

吹薪險語矜先得

大

清游媿後塵字捫青蘚古

寶蓮火試綠

槐新瘦鶴爭僧腊

我嵩

靈魚證佛因蓮池仍映月

大丹室孰

修真禪境空無滓

寶蓮

天風嘯有神混茫江海台

我嵩遠近越

甌隣讀畫摩藤壁

大

題名刻翠筠窺人山鳥寂

寶蓮送客洞

猿馴嶺北巢曾寄

我嵩

樓東夢未陳虎林歸路晚

大倚竹幾

逡巡

寶蓮

金蓮池

山坳數椽屋，欄戶畫生陰。客聽竹泉落，僧知琴趣深。石龍
蟠鬱律，金鯽戲浮沉。妙諦拈花悟，淤泥不染心。

鍊丹臺觀海

石室巉巖峙，仙人此鍊丹。山容浮岼迥，海氣入江寒。紺宇
月先到，陰崖溜不乾。如逢瀛島客，晞髮御飛鸞。

北高峯

三十六灣盡北山，峯最高諸天花散雨。百丈翠飛濤露氣
侵晨冷，風聲徹夜號。胸中雲夢落，詩思醉尤豪。

署齋雨夜

落紅門巷聽滂沱，潑眼春光轉眼過。客裏譚心常恨少，貧
來投刺不宜多。暫寬僮約成渠懶，偶檢詩篇對客歌。尚爰

湖分婁水綠，片雲南望意如何。

雨中送同年倪學博倅歸青浦

雨意爲催詩，聯詩得故知。九峯雲水夢，三載別離思。琴愛

陶元亮，書成汜勝之。

君新輯農雅一書

那堪湖上路，明日又分岐。

雨霽同陸萊臧，出鳳山門過淨慈寺。歷大小南屏，
諸勝尋遊萬峯山。房訪小顛上人，暮乘小舟泛清

波門登岼酒家小飲歸賦五古三十韻

文章氣太盡，絃外無餘音。湖山遊太數，幽趣轉不深。客憎
雨阻遊，待霽始愜心。庸知連日雨，作意留春陰。吾黨抱清
癖，情如芥投鍼。出郭望林岫，淨無纖埃侵。畦花散金纈，礪
泉漱月琴。淨慈大雄殿，寶座輝璆琳。左右夾玉甃，翡翠抽

雙簪春柯不着霜自生紅葉林樵擔癩盡拾餘葉銜山禽
瓏璫屏障列最高南山岑聲傳上方鐘朗颺暢蘭襟杖策
獨秀峯禪室藏幽嶽塵榻僅容膝病僧耽苦吟殘帙堆案
几大半蝕蠹蟬奇句壁上讀劍氣飛霜鐔不辨松與栝幽
閣環蕭穆不辨煙與霞夕照西山沉橋橫學士港一樵穿
雲溽郭門行數武濁酒呼同斟尙未窮峻險亦足娛登臨
君誇脚力健天馬馳駸駸芒屨太偏仄縛我苦不禁好景
留以待異日重邀尋却恐一覽盡從此分商參要使疎間
密興會彌滴淋我歸索枯管君勿嗤蹄涔胸中鬱嵐障作
勢高森森卧聽漏聲滴雨意仍浸淫

大佛寺分韻得漱字

巨靈劈雲根妙相飾金鏤現出大光明共此太古壽列眉
法航開垂耳貝葉覆泉氣鼻孔噓一瀉萬緣漱惜無廣舌
演四部義誰授又無不壞身半截類腫瘤如來億萬化不
受形迹囿須彌納芥子真諦盍研究

葛林園

神仙棲隱地園以葛林名半嶺白雲落一簾芳艸生鶴餐
花蓋飽魚吸石泉清欲覓還丹訣何時鍊藥成

砂寶行 有引

黔地多產朱砂自馬蹄關至用沙壩十里而近自用沙壩
至洋水熱水五十里而遙皆設砂廠洋熱之砂爲箭鏃爲
筒子用壩之砂爲斧劈爲鏡面其龐而重者謂之砂寶見

田山蘊黔書中按黔人皆云朱砂小者如碎珠零璣大者至三十斤而止乙亥夏有客自黔中來浙攜砂寶約重百斤問其價當值兼金千餘兩遍詢浙中大吏及豪商貴公無有樂售者客乃廢然而返於其去也作砂寶行以贈之開陽砂寶若丹甌韎韐騰芒赤山孕居奇有客遠道來萬水千山走珠脛當其采砂入砂廠支木冪版鑿巖磴引蛇附蟻匍匐走膝肉苦撐石骨硬焚膏火灼山魅面磔石搏人索其命劈斧銛峯斫白雪勢與猙猊兩相競忽聞响响伏雌聲潛身石穴屏息聽須臾大貝開礦床溜滴鮮紅土花凝其膚爛然頰散霞其質瑩然朗懸鏡觀者駭爲希世寶質重百斤值千錠載游湖湘遇大賈半價售客客不應

遂涉九江下吳越關吏索錢客囊罄客言是寶鎮百邪獨稟離方火德正馬蹄關距洋熱水匏壺竹節天生定神禹錫貢重帑砥曷不挾之獻萬乘豈知九重訓節儉不貴異物

天子聖淮海何須紀貢珠泗濱不用來浮磬况此龐然大如甕欲舉先憂力不稱若教碎作萬斛珠元氣渾然改其性我昔小字鐫茗華飛瓊頗有刀圭贈搗以玉杵碾輕塵和以蘭膏點埃淨火齊一粒朱孔陽麥光十丈精神迸團璣走盤漬露珠圖書儘足供清興珊瑚之匣翡翠床豔采玲瓏互輝映乃知以少爲貴者利用適宜良可證惜哉此客悔抱璞廢然思返夢斯醒句漏僊師餌絳雪淪落空山

豈為病從茲高卧擁連城甘守長鑱白木柄

宿雲棲寺聯句

精藍矗五雲大初地踐夙約駐錫梵名邨陸我穿篁翠環

閣孤峯壁觀撐大巨瀑栢火落摩盪松鬣動我爛斑蘚皮

縛建利肇乾祐大址復蓮池廓虎追林不腥我鯨走石亂

搏虛巖鬼嘯風大傑構神鼓橐經幢鐫綠文我戒壇散朱

萼火珠忽騰焰大金粟慘刻烙何無菩提灑我陡賊恒河

涸甌甌收殘灰大櫺栳啟新牖花霏前後臺我樹蔽大小

嶠或矯如游龍大歸來乎野鶴佛禽餐煙醉我仙蛭吸霞

弱筍輿樵路停大蒲薦禪房拓其簌飮而甘我有酒快同

酌蚌膏燃熒熒大鴉池敲珞珞筆塵口塵滿我凡境靈境

鑿靜中魚唄喧大暗處狄晴爍衲嬾報更舛我僕倦抱鐺

瓊諸天掃盞塊大兩客話齟嘍息躬占袈裟我吹籟答磬

罽戲墨啗不興大妙諦示無着永夜泉聒眠我長助氣盤

大磚七

鳳凰山懷古

汴梁宮殿委埃塵建國臨江跡又陳鹿子慣眠花榭月鼠

姑曾笑鏡臺春畫屏刻燭傳香吏繡軸題籤賜內人閒殺

清涼老居士蹇驢湖上去來頻

鑪煙香染侍臣衣蟋蟀聲中晝漏稀海霧頻年迷雀舫山

靈鎮日護龍旂蕊淵花落鶯新囀玉砌苔荒鶴倦飛尚有

松風吹珮響兩宮月夜夢魂歸

曉發北關

密樹鳥聲噪江頭挂短篷波搖紅日裏人語綠煙中喚渡
煩津吏持竿羨釣翁故園梅實綻香送棟花風

舟中書所見

小閣珠簾傍水開花深深處唱歌來阿蘭橋北採桑去木
杓灣東買藕廻

漱金香珮曳瓏璫繡袂寒生怯晚風儂似紅蠶纔出繭嫩
蛾飛不上珠櫳

秀州官舍聽雨

朝霧蔽林莽渚煙迷空濛滴葉細流黛濕花碎粘紅斜溝
注簷溜屈曲堂坳通蛙音起四壁答響鄰墻同心訝官舍

裏乃有田家風客憩湖上權跡感陌上蓬苦吟作冰語夏
序來寒蟲

贈秀水朱茂才

墨林

即題其桂之樹軒詩藁

弈葉縣風雅百年存典型故園梅會里太史曝書亭春晚
輝蘭蓼秋山發桂馨蓬門無長物芸閣有遺經客翫湖邊
月情聯水上萍榻看仲舉設權爲子猷停花管珊瑚架銀
鐙翡翠屏紗分簾影碧衫落酒痕青十郡開詞社羣賢聚
德星至今傳翰墨勝蹟著江汀君豈輸夷旦余真媿尹邢
傾脂留粉本學繡羨娉婷共此煙霞氣相忘爾我形放懷
高落落托契惜惺惺解纜歸偏速銜杯醉易醒我家婁水
曲他日望揚舫

舞蛟石歌同朱墨林作

太僕祠前舞蛟石怒目深爪蟠灣環雌峯飛逐精衛去牡
者歸立蒼苔斑松雪籀字嵌琳碧土砂斲骨紅變殷翻雲
力能撼龍窟吸浪氣欲吞鰲山鱗飛髻躍賊萬怪躩足縮
手不敢攀石龜石虎伏階下拳曲拳械啞病孱雷車疾馳
風雨合遠自貝闕珠宮還奇哉石蛟何代物漏網傳說宣
和間柳鄒趙志失載筆弁山吟錄誰能刪蛇蟠名定朱太
史禾錄可作圖經頌荒萊僵卧尺夔屈會須蛻骨凌煙鬢
我來剔蘚訪石友拜石自幸緣非慳

檇李懷古

射襄西望野煙生檇李難尋舊日城軍士春秋齊脫劍美

人臺榭慣調箏山川尚有亡吳恨艸木全非報越兵若使
鳴夷休便賜豈容蠡種立功名

羞婦冢

會稽太守
朱買臣妻

一念當年誤終身不自由此生雖失節垂死尙知羞廢圃
杉青古荒亭艸綠稠却嗤翁子貴浪博錦衣遊

天寧寺

漢家舊賜將軍宅宋代新開聖壽宮一綫谿雲簷際落諸
天花雨寺門通螺青石跨莓苔上頭白僧吟竹樹中收拾
南湖入圖畫月光波影亘長虹

月波樓

韭溪橋畔水倒影上層樓月自波心出人疑鏡裏遊鷗羣

依畫樂蟾魄落詩鈞晚市喧停檝帘燈夜不收

精嚴寺

晉代尚書宅唐時古戒壇禽銜牕竹翠龜吸井泉寒徑密
雲藏易檐深月上難斜環錦帶水浴碧涌香瀾

鴛鴦湖泛舟登煙雨樓

煙雨扁舟客清遊興不孤權歌今日聽詩夢昔年符十畝
萬重樹一樓四面湖錢王登眺處名勝擅中吳

落帆亭

溪岍孤亭落照銜杉青堰水盪空嵌年來浪跡成何事纔
卸征帆又挂帆

東湖州趙季由太守

學轍

茗雪煙波圖書中仙曹合住水晶宮新詩重見孫莘老舊
治仍題顏魯公過雨草分桑樹綠廻流菱照藕花紅長官
自笑催科拙杼袖民間幸不空

吳門蔣子野

莘

訪予於吳興郡署索題虎邱倉聖

祠圖爲賦長歌

蔣侯築祠祀倉聖昨從虎阜來吳興裊攜長卷記顛末古
史攷信禪通徵軒皇河馬圖未授侯岡龍御占時乘其時
粟飛鬼夜哭肇始文字易結繩譬如長夜積昧晦忽見曙
旭扶桑升四目下炤億千載造化從此成精能靈書玉券
闢奧庀鼻祖一脉緜雲仍三王祭川辨原委禮崇追報歌
蠲烝廼構新宮奉木主負輪爛若紅霞蒸列棹隱嶙鬱萬

嶠策府玉城圍層層赤虬揚華翠微曜白獸吐氣丹青騰
不須禹窆搜秘牒三泉亭畔神其馮莫誇生公善說法終
古頑石仍昏曹若非聖人造書契龜繇龍索誰靈承後來
西方起象教三十六母踵事增三教源流一以貫孫子支
派同高會斯祠落成俄十載蔣侯暇日徵詩朋山塘春曉
魚負冰鬱金香酒來蘭陵薦蘩苕苕潔豆登神保醉宴張
華鐙鬱律精芒走光怪四壁蚪斗文光凝夢吞丹篆約僊
侶許我兜率陀天登

遊道場山

棧步縈紆境最幽挂瓢堂外綠陰稠但聞泉響自相答不
辨山光何處秋衆鳥歸雲銜夕照萬松飛雨落溪流果然

法界超塵界始信茲遊是勝遊

同蔣于野

莘

吳山子

育

趙厚之

仁基

觀天寧寺唐

石幢

昔聞吳興多古蹟今見古刹多荒碑龍興光孝陳后叛天
寧萬壽延皇釐佛幢八座斷石四經寫尊勝陀羅尼曹凌
楷隸擅唐代結構勁正無側欹健者首數吳季良人魚畫
簡尤超奇大中咸通歷數世某年月日堪詳稽武宗會昌
之五載梵殿培滅無留遺西方法輪轉浩劫碑碣瘞土慘
黑鷲庸知沉晦不數稔光明大放金琉璃峴山窪罇滷乳
竇當年失泐顏公詩莘老古亭子瞻記石墨久廢存其辭
諸幢佛靈永呵護終古不受風霜欺宋家王孫趙承旨書

體秀奪天人姿，僧厨板桌三大字。普覺後閣輝采，愚慕臨
魏晉運意匠。唐賢築範真其師，邀朋願拓幢萬紙。十指不
惜齊生厭。

感興

吳興領七邑澤國，土田沃衆壑滙太湖羣山。巨天目薪烝
萃淵藪萑苻竊竄伏，大吏檄書來刻期星火速。緝匪戒漏
網窮搜及崖谷，雖云國法嚴毋乃政體蹙。奸胥挾私憤良
民誣考鞫林多鍛羽禽野有鋌險鹿所賴賢太守，幸得剖
寃獄歸耕五畝田。惡賣三間屋。

大田雜稂莠良苗傷其榮，帝治聖讒殄朕師。防震驚周官
詰姦獻比閭，享安平後世保甲法所重。良吏行欲陳利與

弊請眠宋與明邪，慝貽世患我

皇憫蒼生雷霆卽雨露萬類資生成，牧人受牛羊宜輪愛
護情盜賊亦赤子誰與使罹刑。

河朔初罷兵膏田半蕪荒二東困杼柚牽牛不服箱湖鄉
饒水利十稔民豐康積貯非不足米價乃驟昂公然賈三
倍百艘齎盜糧宜嚴泛海禁私販誅姦商湖邊估客船雜
還來何方停泊三四日飽逐秋風颺市門金銀氣不照窮
黎鄉。

湖田四五月耒耦勤東臯六月久不雨一雨綠萬苗我行
過村戶田父歡相招有酒清且旨一酌傾數匏四海多哀
鴻此間真樂郊流民卽收恤老穉猶啼號移粟不常繼何

能免悲噉

至尊念民依宵旰勤憂勞誰獻鄭俠圖重續春陵謠

秋曉過鐵佛寺柬蔣于野

僧堂地僻絕逢迎古佛曇花鐵繡成約我曉來望山色知
君詩已作秋聲隔林鳥送閒雲出過澗人披薄霧行便欲
停舟尋下若鱸魚味美酒同傾

菱湖夜泊

一徑秋陰兩岫斜權歌聲裏有人家漁燈影落疎螢外不
見菱花見藕花

吳興雜咏

西塞山前小艇過綠楊影裏曬煙簑花開易謝春歸早細

雨斜風是處多

燕語呢喃鶯語嬌踏青人過墜釵橋珊珊珮響花間動前
路春情問柳條

桑陰濃綠繞園籬煖室眠蠶四月時小滿纔交兩三日市
間有客買新絲

三癸亭邊艤渡船茶槍新試杼山泉山人笑問來何處拾
得松柴伴客煎

碧雲如幕月如鈎映水紅燈澹欲浮花鹿橋邊花似雪吹
香風送卞蒼樓

打線絲又織手擎蘆錘旋轉製何精妾心好似又頭線千
縷柔絲百轉成

溪岍新田漲綠痕分秧鄰媪各攜羣昨宵金蓋山頭望屋
後嵐煙起帽雲

白蘋洲在水中央六曲紅闌隔水望樓上日高人睡起做
絲花拂鬢雲香

陂亭四面築迴廊學士蓮花舊有莊望月水晶宮裏坐未
交秋夕已生涼

峴麓明霞斷碣橫石蒲齋署侍姬名情癡莫笑馮司李紅
雨零星淚染成

季由太守同彭毓圃明府志傑餞予歸婁東兼訂

後遊賦詩留別

如此湖山好客歸豈不來烏程新釀酒紅葉夕陽臺振策

詩懷聳看雲別思催扁舟茗雪水鷗鳥不驚猜

言臬雲太守朝標補官北上爲寫送行圖幀并題

截句

一鞭晴日送行旌四面樓臺拱碧城中有飛泉寒漱玉出
山仍似在山清

蘊悒閣詩集卷第七

蘊悒閣詩集卷第八

丙子

春日寓吳門將隨慕循陔觀察整為嶺南之遊尋

以道遠不果悵然成詩

豈不戀鄉國家居增百憂壯懷消未得遠道又生愁嶺外
六千里江干一葉舟春吹香雪海昨夜夢羅浮

春雷乍發明晨寒甚對雪卽事

白袷嬉春早紅鑪撥火忙人情分旦暮天意合炎涼東雀
寒爭樹疎花瘦倚牆雷車昨夜響猶似在山陽

郎芝田齋中題其所畫山水兼觀其畫墨竹

鎮洋 盛大士 子履

骨清兼氣清神古異貌古時習日浮靡賴子闢門戶瓣香
倪黃師正派董巨祖春園秀蘭茗秋沚老芳杜滄海紅霞
飛青山白雲補雁橫荒江寒鳥嘯涼月苦大觀造化變萬
象一手吐蟠鱗老龍縮矯翼瘦鶴舞迥然顧我笑餘勇復
可賈亂揮竹數竿夢落瀟湘雨

王叔畦孝廉招同郎正叔丈集學圃卽事

學圃玉山麓人稱小輞川古懷今雨共詩意畫圖傳簷樹
棲禽穩園蔬餉客便藕花風動處香拂釣篷邊

釣篷圃
中齋名

送璵兒赴省試

青山江岫澹煙濤送爾輕帆漾夕陰朋輩賢愚休逞口客
途冷暖要關心可於暇日尋遺蹟應有新篇補舊吟自量

文章知得失向人何必問升沉

閏六月晦扁舟入浙七夕歸里復自吳門往嘉禾
尋又繞道吳興再遊武林旬日之間遍歷浙西三
郡途中卽事率爾成詩

消磨歲月朝兼暮飄泊江湖去復還十日醉傾吳下酒此
行飽看浙西山秋生遠樹澗聲落天入破篷雲氣環姓氏
漫勞津吏問髭毛頓改舊時顏

含山

秀列岡巒勢秋涵松竹林嶺雲餘道氣山鳥得禪心月吐
水中鏡泉流石上琴停舟前路問更轉一峯深

碧浪湖夜泛

淺渚迴汀宿白鷗蘋花風起浪花浮夕陽紅入千峯樹斷
塔青分兩岼樓野權歌聲喧隔淑漁竿燈影落平流春來
草色連天碧幽賞偏宜水國秋

吳山晚眺

深林遠近噪歸鴉鱗瓦參差夕照斜雲氣過江全帶濕煙
光浮郭半成霞幽篁自落空巖翠金粟還霏上界花目極
秋濤拍天際乘風有客泛星槎

同劉茂才

承家小飲瑞石洞

竚窳關靈境清虛空俗氛一尊銜落日萬笏擁歸雲岡脊
煙光合牆陰磴道分藤蘿叢翠裏山鳥亦呼羣

秋草四首

西風吹老碧梧枝河畔青非舊日姿野色不堪殘霧裏秋
心况值夕陽時邊城古驛行蹤少旅館新寒客夢遲憶得
池塘水清淺幾回吟瘦謝公詩

蒼莽郊原落葉辰短榆衰柳並愁人明妃塞北傷心淚庾
信江南老病身鴻爪泥留溪影薄馬蹄霜入燒痕新孤燈
夜雨他鄉客檢點青袍一愴神

擬摹蘅杜贈靈修落日平蕪滿眼愁已恨江淹曾賦別况
逢王粲又登樓長門瑤瑟停清弄故苑銀箏憶樂遊贏得
美人遲暮感楚天哀思寄汀洲

去國王孫遠道邊天涯回首獨凄然舊時紫陌歌金縷前
度青驄控玉鞭倦蝶翅低猶剩粉暗螢影細不成煙莫因

晚序悲搖落冷碧浮螺異俗妍

雨中望湖上諸山

煙靄冥濛遠近中湖山如畫畫難工浮青淺自深中出潑
墨濃先澹處烘水檻乍飛千澗瀑酒鑪不定一帘風登臨
有約開新霽攜得吟筒與釣筒

秋雨新霽出清波門望南屏山色

城頭初日透紅曛漱玉琤琮聒耳聞山與湖爭秋一片樹
從雲借碧三分煙霞我輩真成癖猿鳥何時共結羣短袷
綿輕寒意重一壺村酒未成醺

由南屏山下西北行數里入三天竺

探幽不惜路紆回僻處重逢異境開陰壑濤聲吼風雨上

方花氣逼樓臺每經古刹穿巖入別有疎鐘隔院來直北
稽留峰頂望珠林香閣淨無埃

登天竺寺樓覽白雲中印乳竇獅子諸峯

名山竺國秀峻嶒直上煙鬟第一層泉竇拂雲飛白練雪
龕落日澹紅鐙野猿似嘯風前竹病鶴還眠石上藤此地
皈心依淨域便疑身是住山僧

宿海寧陳氏安瀾園夜集煙波風月亭呈觀察夫

子二十韻

御蹕巡遊地名園海澨傳雲山新畫本花月舊平泉舞鶴
金題拱螭龍

睿藻懸澂潭環秀折香艸蔚叢駢元老曾休沐詞人此憩

鞭垣墉延累葉景物溯當年紅燭笙歌院青山翰墨筵庾
樓明月夜謝墅翠微巔疊浪魚鱗細迴波鷺羽鮮柳栽彭
澤里客憶杜陵田偶侍輜軒莅趨陪絳帳前往還借勝侶
信宿得良緣舒嘯秋之夕凌虛渺若仙層城圍十二大界
豁三千沙鳥風帆外蓬瀛園苑邊迷離炫銀海咫尺現壺
天水檻挑鐙坐藜床枕石眠晶簾鉤送響綺閣幌藏煙笛
韻來何處詩情寄渺然似隨鸞馭近清夢落星躔

登火山望海

天門激浪入青冥一柱高懸勢建瓴日脚虹光吞雁跡峰
尖蜃氣走龍腥嵯峨石塹排雙闕擁護方輿仗百靈沿海
築塘歌

帝力東南列郡樂澂淳

曉渡錢塘江入蕭山界泊舟臨浦訪何孝廉

枚

林表透晨曦扁舟下石磯不知溪岨路遙指酒家旗天遠
碧如洗江空山欲飛素心堪晤語爲叩白雲扉

臨浦夜發明晨抵諸暨縣南關外登岨肩輿入山

暮達宣何嶺

篷牕落星河光露月鈎缺輕裝一葦杭百里去如瞥晨指
暨陽城衆山秀羅列急覓籃輿行無愁屐齒折窮追溪之
源深入雲之穴前岡屬俊嶺近晤倏遠別煙痕烘赭霞密
聚萬花纈一罅窈而深百衲綻欲裂枯藤潛蚪蟠腐蘚餓
鼠齧深山寂萬慮盛暑不知熱况延秋籟爽孱顏削高潔

徑仄平亦頗石峭凹仍凸嶺樹青接天半被白雲截撥雲
下巖梯幽境詫奇絕

自宣何嶺而南入金華義烏縣界過義門至楂林
市萬山紅樹如入畫圖

一峯高插霄萬笏恣鬪險陂亭老松卧磴道叢竹掩欽峯
古網巖石齒簇千點飛泉義門橋衆壑聚激湫人語喧楂
林厓背列屋丁秋意澹更濃到處霜華染丹青李將軍毋
乃虛名忝行行翠微近隱隱青帘颭山果雜橡栗甘苦任
客檢濁醪一大斗壯遊吾何慊

過義渡亭入東陽界望東西兩崑峰暨摘星尖勒
馬峰諸勝

振策山之陽古亭問義渡上有千株松鱗鬣突而怒下有
百丈潭僕夫窘其步中藏太古雪外翳匝月霧前程詣東
陽廬舍審指顧長垣霞光蒸斷塔暝色赴對峙兩崑嶺觚
棱峭盤互雁跡撩客愁虎氣逼人怖股慄足不前樵叟導
前路仍防衆魑迷乞仗山靈護豁然徑竇開犖确萬峰露
歷險始履坦了然夢初寤

石甌山下尋鮑令巖入白雲洞

甌山亘峴西古巖誌鮑令霞城三十丈日華四壁映白雲
棲其隅邃壑洞如鏡天漿衆溜寒玉女一盆淨林柯灑丹
砂煙鬟絢明靚苦篠吸露甘柔荑借風勁投林鳥呼羣迴
翔適其性絕憐行役者風塵憊且病何當築一廬誅茆晦

名姓幽事悅俯仰永息萬物競

進東陽瞻婺門憩法界寺

城隅四面山夕氣西更爽通衢列闔闐百步紺宇敞錫名
宋乾符福地愜幽賞洪鐘鏗萬鈞發吼走罔兩銘字暈朱
碧點畫畧可做客從萬山中來就煙花養翠屏拱而立綠
雲引而上露重苔沐髮風惡蕉覆掌何圖屢肆間異境隔
塵壤空潭印初月此中發真想

東陽道中雜詠

義門南去路灣環兩峴峰尖翠可攀不辨泉聲與松籟風
吹仙珮落人間

縹緲樓臺遠近中石梯層級跨飛虹夕陽已瞰西山背猶

照東山一角紅

甌陽雲洞石空嵌古碣曾題太傅巖日暮松梢晴忽雨倒
飛泉溜濕青衫

隱隱軒韶奏洞庭澗溪鏘玉靜堪聽風流坡老今誰繼莫
漫題詩水樂亭

勒馬峰邊石筍廊舊時羅隱讀書堂招魂倘許離騷續薛
荔牆荒艸尙香

喬家別業孔山巔廢址難尋舊日園路轉溪灣最深處五
更落月有啼猿

烏柏霜紅冷艷新雙溪秋水綠于春柴扉野老扶筇立絕
似癡翁畫裏人

村戶家家射鹿麋兒童竹杖競相持忽聞人語出林際獵
得一雙玉面狸

笙竹村連紫竹村萬叢寒碧繞柴門爲澆酒渴停車坐漸
見山腰霧色昏

層峰窈窕白雲隈圖畫天然四面開莫笑閒蹤如野鶴此
行特爲看山來

東東陽明府程朗岑同年

璋

吏隱蕭閒早放衙深山隱市靜無譁琴堂松竹淵明宅花
縣蓬蒿仲蔚家野老多情獻春酒故人有夢話秋葭盤飧
留客平原醉自剪園菘雨後芽

同程少尹潮出郊尋山至盧宅邨暮進東城遊新

安寺

山城出雲壓山阜雲狀如山負山走山中人從雲脚行萬
朶青蓮落吾手亂踏犖确足重繭剪蔓攀藤搗其藪前山
後山屹聳肩十步九步屢回首叢青深處砥道坦濩刈稌
黍積隴畝盧氏村民聚族居亦服爾耕十千耦懷莘東麓
名臣祠喬木先朝子孫守我思古人百年後空滴重泉一
杯酒放眼且看青山青塵海浮雲渺何有精藍禪話證前
因落日平林變昏黝空山獨往亦快意何況更得看山友
三生舊締石交深一寸新積詩篇厚

玉笥方塘歌弔故明尙書張公國維

方塘流水鳴潺潺子規啼月愁空山孤臣願爲袁粲死血

濺方塘塘上水朝辭天台行暮宿方塘口長星隕地大如
斗玉筍高歌詩數首河山破碎朝廷小半壁東南嘆誰保
舟中天子海上國公問東顧詔來越東逐鹿乃在蕭牆中
君不見燭火螢光細如線燼後寒灰勢難煽徵兵助餉徒
勞勞議守不足遑議戰斷頭恥作降將軍汗青照得丹心
見桃巖峰暮色殷勒馬峰苔花斑忠魂一去不復還至今
子規啼月愁空山惟聞方塘之水流潺潺

東白山少霞洞

絕壁凌青靄千層路屈盤風聲走羣木山氣逼新寒金粟
丹霞室琪花白玉壇當年鹿皮子寤宿碩人寬

龍井崗

掛鐘巖畔石四面白雲封有樹必巢鶴非松亦化龍琅玕
削叢篠琴筑漱飛淙邃室藏經處真靈此駐蹤

孔山

繞屋碧雲合環城紫氣涵重岡亘西北積石鎮東南雁落
溪中峽虹收霽後嵐喬園薶蔓艸秋月冷枯潭

上方院

琳宮舍利放圓光梵磬聲徹上方絕頂雲容迴紫靄九
秋山氣入青蒼松根蘚滑時流液貝葉花深不礙霜小築
庵西亭一角煮茶吸得井泉香

東陽署齋論畫歌東韓起潮

客從東陽山上遊畫成山齋九月天風秋客從東陽溪上

宿畫作溪流百折紆而曲歷觀古時名畫手腕下煙雲筆
端走不求範水與模山根柢盤深氣醇厚太空有色購羣
象元氣返虛涵萬有韓君吳會負才名花卉南田妙寫生
近愛溪山好邱壑欲以畫筆傳詩情東陽邂逅懽會暢高
談四座爲之驚緬昔畫家別支派宋元南北分疆界

國初諸老歸南宗吾州健者廉州翁繼以煙客傳司農海
嶠石谷子意匠開神通西亭老人近甜熟效顰豈肖西施
工後來作者襲其似餘子紛紛何足齒那知耕煙之派本
自婁東傳染香庵中日坐嘯浸灌古液搜真筌風骨乃化
爲神僊比聞浙中畫標格追前賢鐵生粉本漸零落太常
絳帳猶高懸

奚鐵生岡已歸道山馬秋
藥太常近主敷文講席

其餘後先各繼美

藝苑聲華爭鵲起昨宵醉月吳寧臺霜林艷奪山花開畫
工有筆不能繪但見浮嵐涵碧空中來韓君倩我惡脫藁
醉後揮毫太艸艸萬事浮雲類畫圖登臨此際開懷抱君
不見吳門有客來東陽畫水畫山日日忙不知鴻爪他鄉
滯畫筆同誰論短長

九日登吳寧臺

萬壑鬱青蒼迢迢接大荒鄉關一千里風雨又重陽高會
故人共酒尊情話長東西雙峴嶺篁翠襲衣涼

自東陽往金華郡城留別程明府兼柬諸同人

衰柳不堪折黃花空復妍晚風沉笛響離思繞琴絃路寬
雙溪渡詩吟八詠篇愁看甌山月清影照嬋娟

登金華山芙蓉峰絕頂

浙東名勝甲天下江山清峭推金華浮螺四壁列屏幙峯
巔突露青嶮呀亦松智者二洞水蜿蜒赴壑縈修蛇北行
緣澗關異境怪石疊竦環闔如搏如鬪如拱揖左提右
抱紛騰拏奔濤萬馬不得渡其中橫石爲浮槎虹梁瀉溜
一千丈倒吸雨氣浮青霞半天霞飛半嵐雨噴涌雪練茫
無涯中峯一綫繚虛白玉繩不動銀河斜滿山瑤艸散狼
藉化作萬朶青蓮花天台飛出華頂月秋風香飯炊胡麻
素女明粧列窈窕曲房羅帳奉紅紗我身甫入碧雲際我
夢已落仙人家試尋山樵結廬處霜林秋老啼昏鴉陂陀
劃開巨靈掌雙龍穿竇迴平沙長松颼颼撼絕壑山南山

北陰雲遮

赤松山放歌

曉發金華城直上北山頂北山高嵯峨萬象豁虛迴螺鬟
娟娟雨新沐搖蕩空青入遠目叢篁宿霧烘日光爛若丹
房挂紫玉赤鱗老松走攫拏吞吐百丈天台霞碧桃萬片
大于掌香塵撲地輕于紗金光瑤艸遠在縹緲際唯見修
藤古蔓紛其掩冉而鬚髻菊經秋而披秀蘭當春而吐芽
感艸木之榮落惜人間之歲華緩山有桃鍾山有李仙人
之容綽約處子當年山中牧兒真不死亂石何爲叱不起
雲中鷄犬皆昇仙羣羊僵卧絕可憐鴻迴翔乎千里鳳續
紛乎九天羗延佇兮四顧杳璿臺之翩翩人生行樂須及

早唯有青山長不老赤松山中雲去來赤松山下石崔巍
浩歌不見赤松子攜酒獨酌流霞杯願爲山中雲母爲山
下石雲歸收氣遊太虛石泐飛沙慘寒月

登元暢樓

卽八詠樓梁太守沈約題詩處

飛薨勢壓翠鬢欹高阜巢雲結構奇羽士慣騎千歲鶴山
靈自愛六朝詩南來嵐氣開丹嶂西去溪流漾綠湄旅客
愁腸最淒絕霜天聞得角聲吹

金華道中打虎歌

猿臂將軍挾飛鏃左射豺狼右麋鹿有虎來從武義山竄
入金華踞西麓村人逐虎持杖走倏忽數人落虎口餘者
垂斃慘呼痛或傷其股或斷肘吏胥奔命報將軍將軍躡

馬城上圍城頭鼙鼙擊金鼓帳下材官猛於虎礮聲雷轟
焰蔽天虎與烈焰相周旋以火攻虎虎不窘虎笑將軍力
已盡將軍曰吁虎何愚燎原一炬苑者枯虎從何處藏其
軀一箭射虎虎傷脛帶箭虎來索人命袖中抽出殺虎刀
迎刀虎氣何咆哮白光一道淬霜鏑虎背刀飛虎頭落獵
戶喧呼昇虎歸觀者猶懾死虎威髭毛半黃腹大赤斑爛
閃電流光輝華鎧高張酒浮綠徧召裨官啖虎肉醉卧金
華城上頭猶聞虎嘯風颼颼醒來月上東山陬沒鏃飲羽
石虎愁男兒如此亦快意何用萬里求封侯

金華旅夜

溪閣燈殘酒半醺簾波風動細生紋客心已落蘭江水猶

夢梅花洞裏雲

蘭溪舟中偶成

溪岼山雲接水雲鷺鷥沙際自成羣越舸夜傷前溪宿水
綠蘋花帶麝薰

壓髻花枝照水鮮船家嫂妹喚同年

江山船坐客呼舟人
妻日同年嫂妹日同

年紅鐙勸客深宵醉桐子山頭月正圓

嚴州道中

雲中高捨鎮東關郭外林巒擁髻髮五兩風吹舟一葉落
霞飛過富春山

舟進七里瀧過嚴子陵釣臺醉中作歌

生不得見天下奇山水使我胸中鬱塞磊落之氣無由開

今日扁舟逸興獨清發仰視江天一碧秋光萬頃空中來
山不必褒斜閣道高插霄水不必龍湫億丈深無底嚴陵
之瀨祇七里幽峭清激有如此兩崖對抱雙玉龍溪門一
綫浮空濛峰尖倒從澗底轟水氣上與青天通疎林紅日
掃煙霧輕帆飽挂山頭風山蒼莽以結翠風飄颻而延涼
白露初降落葉半黃把酒獨酌慨當以慷羊裘客釣半江
雨此地青山足千古一星自照荒臺寒萬壑雲深不知處
雲羃羃兮石峩峩若有人兮山之阿恍惚兮延眺心悵惘
而咨嗟金觴醕兮朱顏酡吟綠雲兮餐紫霞江天吹水入
空去更欲揚帆采石華

嚴陵釣臺弔宋參軍謝皋羽

擊碎竹如意巫咸下九閨青楓落寒月朱鳥泣孤魂燐火
清秋夜江山碧血痕墓門無雜樹薇蕨首陽存

韓蘄王將臺

臨安鼙鼓陣雲開大將黃天蕩口來百戰中原爭半壁一
江落日照孤臺清秋碧草埋荒鏃終古青山老異才獨對
蹇驢湖上月英雄髀肉不勝哀

一權

一權嚴陵瀨輕風送客歸溪門飛月鏡石脚碎雲衣斷峽
灘聲惡空山樹影稀幽人棲隱處薄霧罨林扉

桐廬月夜

百道泉聲沸一江秋影長桐君渺何在松子自生香樵路

沿溪覓漁梁隔岼望清輝千里映寒碧落飛鯢

富陽

越角吳根地帆檣遠近通客心飛鳥外秋意亂山中碧浸
江關月寒生塔頂風篷牕清夢醒手剔燭花紅

舟過富春江至錢塘

柔艣聲中唱竹枝富春江水漾澄漪自呼明月持杯勸未
免青山笑容癡荻浦花疎鄉思起蘋洲霜冷夢魂知浪遊
太息無長策載得扁舟一卷詩

江行口占

六和塢下尋詩去七里瀧邊放櫂還明月錢塘江上水清
光長照富春山

閒雲心跡水鷗知客館吳寧夜鬪詩紅雪門前烏柏樹醉
吟羨殺呂徽之謂陽湖呂君榮慶館于東陽官署

帘燈何處酒家扉水國霜寒稻蟹肥擬泛西湖補重九蘭
溪新買菊花歸

金鼓洞訪巢雲道人

伐石曾聞金鼓鳴燒丹羽士學長生焚香一室古懽暢落
葉半山道氣清幽洞僊禽時喚侶亂厓奇樹不知名瓊箱

飽讀羣真牒更羨琳編手輯成道人近輯金鼓洞志八卷

登韜光寺煉丹臺觀海借璵兒聯句限九屑韻

漶留築精廬子履高厯界危岳廣嚴額翥霞徵璵仄磴壁剡雪
惛題肖峒岷履巢溝枕屹嶮客攜雙鳧青璵眼眩萬花纈

叢條灑頰砂履虬幹撐古鐵篔或篔篦橫璵蘇訝蠖蝓齧

初桃引而升履半扉設常閉敲竹喧吠龙璵捫碑跨跛鼈

凍鰲佛面頤履病齏僧齒缺筮埽經幡塵璵泉沁甃井泮

呪蓮蓮湧金履飼魚魚出穴其旁有石龍璵噓氣吸瓊蛭

崇臺轟干仞履疊巘紆百折僊去丹竈摧璵鶴守洞門鑄

天風忽吹雲履海壖倏騰蜺望蜃市蛟宮璵架彤梁紫椀

冰夷鼓碎碣履鮫童舞蹙躡旖旎旒旒璵笈簪筠節漣

殞紘幻百怪履形勝控兩浙茲峯靈鷲近璵上界塵堞絕

撼撼枯籜隕履娑娑寒翠擷拄杖憩松寮璵促席觀竹篴

床供管生坐履茗恣盧仝啜喜叩無量音璵巧運廣長舌

聖火虛簷微履羲晷遠崦眈嶺北暢斯遊璵和南此焉別

須避渴虎威履 惡拽猪馬繼林駢衆鴉噪與 梯嘶一奚跌
湖隄艤艤舫履 霜飈冒颯颯夜歸翦蟲蠟與 詩夢亘巖嶮
履

食蝗聯句

嘉味江鄉擅登鉶配蛤蚧水田資土液子履 冰殼蛻晶城磨
銼埋三寸封泥滄一函肥時胥入簞微與 採處不揚帆脂誤
魚腸刮津分鴨背鵠酪羹調甫熟履 腰鼓聽初摻指動沾
沾喜涎流滴滴饑孕胎全混沌與 剖腹露空嵌滂積教頻
澣腥多恰愛鹹畧宜薑屑灑履 詎費栗薪炊侑醴傾微醺
含漿洗古械咀噉唇帶膩與 捋搗口遲銜滑恐難留筋痕
防易浣衫盛盤憐鞞薄履 對案話詰誦潔待齏催漑貪思

鼎戒讒性寒能療渴與 齒決冀寬監賦物言徵典搜枯語

笑儻馬刀工比象履 鰕菜並超凡問價廉爭買攜筐餉密

緘巖龜翻舊譜與 小技愧雕鑿履

楊教授蘋香同年于高 招集杭州學署觀南宋光

堯石經歸同璵兒分體賦詩束蘋香兼寄范學博

懋裕

校書不登天祿閣弁陋難免經生嘲墜簡殘編蝕蟬蝨腐
儒臆見爭喧呶楊侯便便孝先腹卓識力剖羣言淆范叔
才高邁屈宋廣文一官同繫匏元亭坐擁城萬堞問字有
客蓬扉敲天門狷翼閃華電凡鳥不敢窺其巢我來夢遊
羣玉府旃旄眼眩翠鳳苞招觀光堯宋石刻兩廡鬢序撐

高嶠霜藤蟠青匿鼯鼠雨網罨綠牽蠨蛸蠹蠕動猱攫
走鼯負伏聽蒲牢哮細剗封苔剔積蘚毋使過眼嗤虛拋
當年臨安支半壁坎險震難屯蒙交中興堂構議憲典縣
蕞艸昧營檜櫟乍試師干輒偃武厭聽鼓鐸喧鉦鏡帝曰
汝激奉朕旨經腴饜羅珍肴詔勒琳珉餉藝苑蓬心朕
欲閒其茅諸生誦肄守程課不率教者移之郊遂開辟雍
蔚髦俊奪漢儒席平謹饒六經孔孟燭星斗列聖統緒乾
坤包麟編育左史筆重禮解小戴博士教從此圓橋式經
訓多士願筮連茹爰惜侈太平作粉飾義旗河洛韜弓鞘
江心寒嘲咽桴鼓陣雲冷鎖蛾眉姣不聞留侯訪黃石但
見亞父歸居鄭北兵天塹竟飛渡九泥何處封秦峭勒石

燕然事虛杳南風不競休登輦有人太學具章奏叩頭慟
哭趨竊切轉笑書生妄持議敗乃公事迂而膠倉皇航海
晁危石六龍波撼鼉鼉蛟覆舟砥柱歷浩劫萬卷電激遭
風颶江陵文武道消歇巖關鐵騎揚飛髑禿支僕谷相輪
動戰袍血濺紅旂旃汴梁銅駝萎荆棘滿朝肉食盡斗筭
滄海桑田變陵谷陳迹夢幻水散泡西番妖僧大肆毒鑿
山鏟石殊魚然冬青花哭唐義土荒陵石馬嘶陰颶冤海
難填精衛石宮衣慘碧珠流鮫殘碣倒仆雜瓦礫築削恣
意施斤鉋申屠苦口得救挽偉論千古傳瞽瞍爾來七百
幾十載神鬼呵護完碧礮譬諸崑岡炎火熾不與玉石同
焚炮建立書院庋書庫收拾碎壁磨砂頤排廊碑片八十

六拂拭字跡苔紋籟遠證鴻都近陝蜀讎勘點畫齊傳鈔
當今文士競嗜古掎掇墳籍相誇談洪氏隸釋趙氏錄修
纒遠汲舉長笈炫奇爬羅傲李涿辨難往復窮尸佼一字
三字審同異迫窘詰屈儒林譏嘉祐舊柔湖南仲斷磚埋
沒心增恚靈光巋然獨存此何異球石珍艷鄙春芹香濃
藻水綠飛鴉集木音咬咬釋奠春官敦羽籥翩其來舞蹇
紅綃花外朱輪倚藤壁輕驄煙柳籠鞭鞘搨摹萬本貯經
笥銀籤繡軸穿蘭髻楊侯飽浸古液厚金炊玉饌傾天庖
釣璫廣樂洗俗耳剽棧戛籟調笙篳武林聯襪縱譚劇憐
我耕硯田多磽蔚宗石交締岑契鷄鳴風雨聲嘒嘒羨君
高享吏隱樂快酌婪尾浮大甔提榘邀客古懽暢醉看弓

月升林梢

盤溪歸釣圖歌爲凌樞部

鳴啣作有引

樞部字覺甫一字泊齋湖州烏程人嘉慶壬戌進士與余
同膺庚申鄉薦居官有政聲會上疏極陳馬政之弊請
旨清理列具規條

天子重其言

特諭酌議施行後因病歸里杜門著述其家在吳興盤溪
之晟舍疏泉通澗結宇依巖極幽棲之勝丙子仲冬相晤
於杭州學署之石經屋贈余以所訂太白山人集練溪詩
文集并出歸釣圖索題長歌時先生匆匆解維卽席話別
爲賦此詩以餞其行

金門大隱青雲客胸貯賈生董生策解綬歸來理釣竿紅
拂珊瑚樹千尺盤溪之水清且幽田田蓮葉波心浮杜陵
艸堂浣花里舍南舍北來羣鷗許身自比稷與契豈爲尊
鱸卧泉石補袞平生一片心付與青山照明月盤溪溪口
漁家船一簑秋雨一笠煙盤溪溪畔漁家屋邁軸有人寤
歌宿道場山色連何山山扉突露青灣環碧雲迢迢天際
望夢迴青瑣趨朝班吹簫樓上山人去挂瓢堂外斜陽樹
多少漁磯垂釣人孤負湖山最佳處先生身寄江湖中抱
此磊落魁奇胸醉後高歌出金石夜半鐙火光猶紅扁舟
一葉盤溪水人道仙人郭與李田園未蕪歸去來黃花競
向霜前開送君歸盤溪溪水涵平蕪詩從盤溪尋酒向盤

溪沾披君盤溪歸釣之畫圖羨君真是神仙徒世上乃有
此等神仙徒我願浮家泛宅與君持竿日日長相俱

萬峯山房贈小顛上人

每恨見公遲才名我舊知澆胸百壺酒埋骨一龕詩顛師不受

米汁戒終日酣飲狂歌所著有法喜集

蔬筍空禪習煙霞入遠思醉吟碧山

暮清韻落松枝

湖州趙季由太守署中晤張椒卿時余將之京師

去年別君虞山麓幽鳥一聲動春綠今年逢君茗水濱昏
鴉萬樹啼寒雲孤燈夜雨扁舟客楓岬蘆汀氣蕭瑟那堪
會面訴離愁况復相逢又相別明年花發長安路明日江
干從此去今宵置酒愛山臺太守醉賞梅花開問君匣中

藏古劍何時鐵冶重磨鍊龍泉顏色吐霜花會見精芒閃
飛電燕臺嘯月立蒼茫飛夢吳山越水旁落英紅飄碧雲
暮願君隨時愛景光

十二月十九日汪厚夫侍御耐山司馬招同楊叔

溫畢季瑜彭甘亭徐秋士孝廉

元潤

集趣園作東

坡生日分得七言古體一首

坡仙謫官渡南海紹聖越今七百載嶺外留傳丙子詩青
山無恙風流在僧臘逢公覽揆辰心香一炷詩情待頻年
笠屐湖山遊尋公遺蹟常勾留參寥試泉識智果水樂題
詩憶子由今年歲又逢丙子半載看山一千里夢中恍聽
公談詩飛雨浙東半江水江梅花發客歸來趣園高會賓

筵開華堂張鐙將進酒紅荔黃柑爲公侑一杯婪尾江南
春祝公永享名山壽千秋古誼結古懽曠世詩仙締詩友
憶昨征帆過茗雪愛山六客今得九一門再見眉山風會
合賓朋無俗偶年年每遇公生日祇願同儕聚同室年年
願值公生辰引我詩境開清新酒盡深宵剪紅燭尊前重
把坡詩讀

白題煙濤雲嶠圖

寂寞謝塵事經旬晝掩關忽披胸鬱塞縱筆寫溪山煙靄
迷青嶂雲容壓翠鬟石坡松鬣動有客採芝還

子履孝廉以所作畫卷屬題爲書二截句於後

彭兆蓀

香溪洗筆寫嵐顏人在宗支伯仲間十丈軟紅蕹不

得袖中詩本畫中山時將北上

平生夢繞玉孱顏那得巢雲屋數間曾證永嘉公案

否不妨見道并忘山

蘊縻閣詩集卷第八

蘊縻閣詩集卷第九

鎮洋 盛大士 子履

丁丑

途中次徐秋士孝廉韻

谷口人語雜馬頭詩思新掃塵微作雨吹綠自生春
浮嵐合雲山望氣醇宿林鳥呼伴天際憫勞人

夜過鄒縣車中聯句

暝色入邨煙衆山斂虛碧徐元潤峻坂馳羸驂犖角蹋危石

大僕夫行不前一步復一蹙元潤野霧眯塵晦馬行沒無跡

大祗餘衰艸痕路閃一條白元潤飢鴟如人噪怪石聳鬼立

大墓門翳宿莽漆燈半明滅元潤怒鱗何代松敗甌誰家宅

平生好奇偉談怪口咄咄元川涂飽風霜聞見戒局迫

大膽雄三斗酒筆屈一寸鐵元壯士喜夜行仗劍噴徹循

大投筆志未成忽為遠行客元素衣涅而緇塵面槁不澤

大天涯此兩人落拓共晨夕元同歷險如夷遑問通與塞

大乾坤有真氣俛仰愜所適元請眠北斗光耿耿自清切

士大

宛州道中絕句

連岡疊巘亘西東摩詰春山粉本同馬上剛逢小寒食鞭

絲人影夕陽中

新綠林皋雨後天馬蹄踏碎亂厓泉舊遊此地停車客共

說青山勝昔年

晤畢子筠孝廉於宛州因偕徐秋士同至曲阜途

中有作

岱宗青不斷平楚鬱蒼茫春水藻芹綠出郊驪駱黃淳風

民近古禮教澤流長仰止寸心愜瞻容謁廟堂

闕里同畢孝廉華珍 徐孝廉 元潤謁至聖廟

呈孔冶山襲公

遂閣輝珠斗雕甍拱絳霧大宗歷世爵振古仰斯文數典

留彝箚於論奏鼓鼗四方習禮士汰泗聚斷斷

至聖手植檜

手澤遺梁木靈光蔭古今風雲長拱護泰嶽蔚沉陰大塊

蟠根厚資生化雨深逍遙曳杖日松栢歲寒心

顏子陋巷井

改邑不改井寒泉激四空高蹤百世後樂意一瓢中負郭
田廬舊逢源左右通蕭然環堵室道味飫冲融

謁孔林恭紀

大東靈秀蒼崇巒巖嶷翠鬱盤萬古松楸飽風雨兩
楹俎豆肅衣冠列侯第宅承先代望秩威儀配泰壇魯甸
春光餘落照防風紫氣拱瀾漫

夜行至東阿舊縣山溪最深處

停車不得路乞火失郵家壯士行何畏吾生本有涯石欹
蹲怒虎徑曲赴修蛇雲漏一鈎月前岡煙樹遮

趙北口

山川代朔居形勝地接幽燕氣自雄聞道酒人多俠客至
今易水有悲風碧天春艸連河畔明月鄉關入夢中一曲
么絃調玉柱深宵留客醉顏紅

交河

津亭送客渡交河卷地黃沙湧白波暝色孤鴻關路迴風
聲萬馬戍樓過荒畦艸沒行蹤少古堞燐飛戰骨多蒼莽
山川感今昔倚天長劍發高歌

雄縣

披裘侵曉跨征鞍殘月疎星馬上看沙坂百盤驚隼擊關
雲一線落鵬寒氣吞全趙輿圖濶險阨交河地勢寬百尺
城樓窮遠目望中直北是長安

端午前一日同人集陶然亭聯句

寂居苦沉冥畧試脚力弱塵紅輒不飛巖翠秀若削大士麥

秋景未邁槐夏氣先灼芳樽湛蒲葵風襟灑蘭若畢華亭

尖霞練拖石隙雲斤鑿颯然天際翔靈瑟宵宵作陸元座

中盛孝章解衣吐磅礴仲文氣亮拔銅陽性寂寞劉樞周郎

偕二陸先後入京洛九峯來彥和鳴和在陰鶴徐元健者

今徐陵招羣會南郭敦盤踵曩賢壁間有王述庵先生詩履鳥踐新

約陸模昨宵宿雨收紅林散餘萼啄泥鳥亂啼聚網鱗出躍

錢寶琛江鄉有故人鴻爪各飄泊京華遯十年卽今慰離索

周曰堅鍛翮驚頰風何地無矰繳運或暫剝蹇儒豈甘隕穫

大白日混燕石曠野識趙鐸習俗道義孤千秋懷抱各華珍

修名戒不立浮譽矧可攫跳丸疾晷輪一逝駭錯愕元今

日且銜盃破此萬緒惡誰爲長鯨吸試以大斗酌樞舊雨

來不來新知樂莫樂西山一片雲爲我掃炎焞元潤陡若抱

虛警秋心已先托歲候昏旦變物理靜中度模茲亭名陶

然到此脫羈縛縱譚碎擊壺抽思興探鑰寶忽聽樵者歌

蘆岫斜陽落回頭指白鷗續遊勿負諾日堅

陶然亭分韻得陶字

野曠浮雲合亭荒落日高興來成獨往勝事屬吾曹旅食

會彌月行吟此避鷲風聲呵白壁山色落青袍節物鄉關

異賓朋意氣豪酒壇雄拔戟詩侶捷揮毫擬學誅茆宋終

慚運甕陶附書愁契潤理髻感蕭騷小旱遲飛澍深耕憫

作勞林無鳩婦喚澤有雁羣
傲北地谷炎煇南中激汎濤
每嗟居不易稍喜暑堪逃
榆葉翻沙渚楊花攪隰皋
溪深鼓薤荻徑曲亂蓬蒿
懷抱登臨拓襟情澹泊遭
浩歌歸路晚重與泛松醪

題江亭消夏圖次陸子鐵孝廉

元文韻 陶然亭係江氏所築

額曰江亭

出郭清遊興不孤柳條踈地倩雲扶
綠陰五月潤將滴嵐影一簾澹欲無
何處江皋采蘅杜不妨名氏混菰蒲
秋林擬踐停車約重繪癡翁淺絳圖

午日集周小石上舍

日堅齋中卽事

野鶴閒雲物外身往來蹤跡各相親
天中尊酒成良會日

下詩篇贈故人煙水一厘容小住
風花五月似殘春十年慣作京華客
老我驚看雪鬢新

旅夜柬畢子筠

繁桃豔春塢老梧凋秋林艸木有榮悴
四時成古今荒岑多積落靜巖無噪禽
有美我所思時惠空谷音不吹齊門
竽徒工郢中吟塵海浩無岬何問升與沉
郭隗不築臺馬骨埋黃金金寒鬱愁氣
暑月顏重陰今夕復何夕與君酒同斟
簾疎風襲裾篔簹薄雲生衾銀河耿天際
澹無纖埃侵留此一片月照君千秋心

董琴南編修

國華

次和旅夜韻見贈疊韻賦答

結交何所尙企茲大雅林前綏疇惠我觀
止懽自今孤雲

聳一鶴餘響咽衆禽廣座靜不喧叩彈瑤瑟音聞君十年
來癩癖作瘦吟理超旨乃暢心苦思彌沉蛟脊老寒玉龍
窟躍古金沁脾斲冰骨滌暑延秋陰讀句憫旅懷深酌復
淺斟短檠照殘夢客心厭寒衾虛牖自生月萬慮何由侵
更誰併予美阻君獨往心

夢登仙人樓嘉樹無雜林不知幾千載青青直到今下有
九華芝上有五采禽襟披穆如風泉嗽冷然音引境入窅
忽掉頭動高吟人生中歲後去晷愁夕沉聞道苦不早享
帚慚千金安得露華濯蒲柳迴衰陰頽質倏可變大哉元
化斟潛璞或韜采隻影無愧衾感君辱贈翰戒我塵懷侵
拍肩問洪厓落落蒼松心

苦熱篇柬琴南編修子筠孝廉

萬木沸蜩蟬寒蟲咽不語炎官鼓疾威厥勢不可禦一廛
賃市間湫隘暫息處雜呢四方客日夕混爾汝止樊朝驅
蠅穿屋夜憎鼠執執戒炙手滴水不潤礎焦煙出枯林泥
潦沒淺渚安得鮮可食誰云美可茹倘非素心人何以慰
熒旅茫茫身世憂俯仰觸萬緒南士來北方使人識寒暑
堂懸北風圖仙袂翩若舉瘦卧高捫星冲飛輕化羽招涼
明月珠晶光一囊貯桐陰正延碧團露葉溚溚平生冰雪
腸持此自矜許

宋謝文節公號鐘琴歌

有引

琴長三尺四寸五分額廣四寸腰狹三寸四分題曰號鐘

銘曰東山之桐西山之梓合而爲一垂千萬古署尾有疊
山二字新安吳氏得之於京師市肆繪圖徵詩琴南編修
邀余同子筠作歌

冬青無花月無色天水雲寒四山黑建陽卜肆古號鐘斷
紋迸落霜苔封東山之桐西山梓地老天荒心不死十二
金徽淚血枯一徽一淚紅模糊唐石峯頭轉茶坂響咽冤
泉泣秋晚南冠獨自操南音海角虞淵斗氣沉竹裂蘭摧
烏啄肉有死義不餐周粟故人魂返零丁洋空山老猿愁
斷腸絕調人琴後誰繼晞髮山人竹如意虛廊碧火照深
更四壁悲風絃上生

同作

同里
畢華珍

往聞齊侯琴是名爲號鐘落斧引纏不異製古材慘
澹三尺桐抱琴亦何爲麻衣艸屢慟哭中大都人士
久莫識南宋孤臣謝枋得嗚呼邦國已殄瘁人之云
亡何足惜江革却粟未戀身申胥絕食不返國有木
不覩冬青林有琴不彈海上音君臣骨月厓山沉但
聞宮角變亂風雨聲悲唸魂兮往從定何所死得葬
夷齊山前一坏土人耶琴耶此終古君不見唐石坂
建陽市徒跣當年幾轉徙焉知王氏有臘祀亦不書
永初以來新甲子嚴叟旣棄世世亦棄嚴叟賣卜終
愁在人口借才異代誠何心君義臣忠兩無取况聞
歐刀柴市風雷昏巫咸不下招銜冤高張鳳尾中斷

絕文信國琴閣金石徹調徒聲吞吾將譜作雙桐引

付與哀彈汪水雲

蘇齋集飲呈翁學士覃溪先生

大雅久淪落蘇齋獨歸然賓朋選才俊詩酒屬神仙此會

不可得風流七百年愛山傳六客勝事踵前賢是日主賓六人分體

賦詩

讀史雜感

周京集多士馴雉翔皇風漢廷臣相如貢道邛笮通古來
樽俎地王會旌勲庸文章行遠器兵革潛消融酈生三寸
舌萬矛摧敵鋒華辨雖譎詭尙勝汗馬功豈無蘭臺令掌
故嫺禮容宰相多讀書德望中朝隆外廷仰風采駿業垂

龐鴻布被劇可惜勲階列三公

南軍利行水使船如使馬北軍利行陸屯戍集平野峭函
古神皋建瓴高屋下武皇席鴻圖開邊震函夏教戰昆明
池旌旗五花墮精兵重訓練奚論多與寡水陸審地勢強
弱測亦叵在德不在險邈焉緬古者三王以文治五霸以
力假

漢祖過豐沛光武巡南陽雖賜父老租每恐農時妨陽春
霈闔澤宴醕懽八方青旗陰郊甸千里騰龍驤詞臣富文
藻獻賦誇長楊誰陳諫獵書好樂遊無荒耿耿忠愛心帝
闔翹首望出門眎雲漢永夜星垂芒塞鴻路寥廓瑤水雲
蒼茫

愛錢不愛身貪吏戕其生愛名不愛身廉吏全其名昏夜
稟四知介石貞鏗鏗至清水無魚讒構傷蠅營伏波適瘴
海藁葬歸西城薏苡爲文犀難與貝錦爭劉寵選一錢何
損清廉聲身家瑣瑣計更比鴻毛輕千秋身後事青史長
崢嶸

尋寄園遺址

古樹不藏屋白雲四面生閒官多著述老眼見承平野史
今殘佚青山失主盟高樓一聲笛落月望參橫

對月偶成

梯引初梳月上弦浮雲咫尺判人天年來倦睡非關酒此
後春情欲化煙漸遠星河勞悵望最高樓閣病嬋娟洪厓

枉訂遊仙約寂歷山陰不放船

送遠

把酒東風一洗愁夕陽送客醉登樓亂山不見飛鳥迹老
鶴獨鳴高樹秋古戍雲低寒不落碧城路遠夢還留親朋
莫悵關河隔慷慨平生足壯遊

宋徽宗十二巫峯靈壁石歌

有引

石係吾鄉廣堪齋中所藏竹癡老人手繪圖冊空嵌萬竅
蒼潤欲滴嘉慶丁丑子筠孝廉北遊都下携冊徵詩余同
董琴南編修作爲長歌

昔聞吾鄉竹癡翁弄藏富欲伴王公廣堪之齋萃珍秘奇
石天巧非人工巫山十二靈壁峯汴梁舊物傳徽宗宣和

花石七百載歸留靈氣滄江東天青無雲秋碧空風雨忽
合山迷濛前峯後峯千萬重千重萬重咫尺中陽開陰闔
變幻無常容但見雌者霓雄者虹潛者蛟躍者龍煙霾滅
沒盪昏曉上與造化爭神通瓊花島口吹朔風銅駝走入
荆棘叢崑山玉碎老魑泣劫火大地灰飛紅江流茫茫石
不轉試問呵護誰之功癡翁擅神鑿老眼明雙瞳夢登峨
峩之絕頂玉華四照開瓊瓏醒來滴露潑黛墨紙上疑有
春霞烘燕山塵沙十丈封虛牖忽墮青芙蓉冷然漱玉鏗
瓏璇江天涼雨催孤篷客程計日行匆匆子筠時將南歸石交松
栢貞三冬願君守此子孫寶時與几杖相追從仙人贈君
九節筇丹厓翠壁攀蒼穹青山讀書落日暮五嶽鬱翠捫

高胸

同作

吳縣 董國華

廣堪堂弄古研山印記傳自宣和間我不見山却見
畫想像楚岫峩煙鬟蠹者爲峯卧者嶺六六連娟黛
螺靚墨池一掬通湘波夢雨靈風寫秋影瓏瓏皴瘦
交蘇紋會入太清侍道君汴舟千里運綱石咫尺乃
有巫峰雲劫火銷沉悲良嶽盡斲奇礪製飛礮卿雲
萬態化作灰硯北偏留舊蟻綠當時游藝重文房風
流不數澄心堂一拳巧縮九疑秀壓倒海嶽庵中藏
陵谷匆匆人代易石色蒼涼天水碧憑君莫補博古
圖恐學蟾蜍清淚滴君不見硯田今歲枯不堪安得

墨雨生秋潭青山隱几致蕭爽我夢已落瀟江南

北湖觀蓮次徐秋士韻

傍隄高柳噪鳴蟬小閣幽棲愛地偏紅疊水紋三折細翠
團雲脚半鉤拳前溪影澹初生月遠夢香多不散煙記按
花深深一曲鴛鴦湖畔木蘭船

去歲遊鴛湖
適荷花盛開

京邸有懷畢季瑜丈

高原煙樹鬱青蒼社燕秋鴻各一方癩病已成中散癖浩
歌誰識次公狂金臺馬骨埋荒艸水國鷗羣冷夕陽聞道
園廛逋稅畢免教簿吏復登堂
摩挲青鏡悵流年短髯驚心節候遷不信松芝堪佐餌却
看雞犬已成仙銅陽卧月中宵醉杜曲唵秋萬口傳風雨

論文話疇昔待尋歸權續前緣

丈題拙集有句云君住巷
南我巷北莫教風雨阻論

文

杲日炎蒸水涸池

君王宵旰切憂咨禁城花月仍良夜舞榭酣歌異昔時三
輔征輸傳絡繹二東杼柚費支持平原乞米長安客欲破
愁兵仗酒卮

蕭瑟江關雁一聲鄉心愁絕庾蘭成頻年早潦悲中澤故
里音書隔去程斷隴晚煙行跡少荒城曉角旅魂驚吳雲
夢繞燕山月願乞郵筒慰客情

子履北歸出示近藁卽次見懷原韻四首

同里 畢憲會

一別相看髣髴蒼南箕北斗奈殊方久耽獨處貧非
病忽見同心喜欲狂淥酒細斟遲皓月黃昏雖好戀
斜陽老懷不作春明夢猿鶴休嘲舊艸堂

堂堂白日去華年不覺情隨萬事遷羨爾蕭疎塵外
物慚余落拓酒中仙窮來肯恥因人熱癡絕終思附
驥傳細數晨星幾人在誰相知我亦前緣

寥天不見躍龍池聞說 朝廷六事咨室女嘯歌原
爲飽野人作息卻憂時豈知 聖德勤宵旰早格天
心默護持獨有東倉雀鼠壯江河無計可填卮

詩入愁腸哀艷聲遺山標格自天成黃河水落棲鴻
澤白露秋高數雁程國士久聞羣目異吳蒙再見倍

心驚年來削札嵇康懶怕達空函殷浩情

淮陰道中得座主何先生赴悲慟不能成詩及留
京師每憶浙西兩載之遊泣然出涕率成六詠情
見乎詞

國士無忘一飯恩我來淮上愧王孫定文恐負陳思托作
賦難招楚客魂千里春心傷目極兩行清淚暗聲吞燕雲
策馬成何事不及憑棺哭寢門

繡衣日下耀華蕤驄轡江關絳節馳憂樂蒼生同俯仰東
南元氣爲扶持著書未了名山業待士還餘廣廈思莫問
羊曇舊游地呼猿古洞夕陽遲

江淮轉漕驛書回防海軍巡浙水隈五日竟催張尹去幾

時重借寇公來使君封樹仍遺澤丞相持衡亦愛才記取
冰壺心一片歲寒東閣有官梅

七郡隄防石岍平觀濤末座侍枚生旌旗海市秋瀾濶刁
斗霜臯夜月清野浦漁梁愁放槩斷雲鈴閣失吹笙鹽官
道上重回首落葉聲催杜宇聲

傳聞廣柳下黔陽西盡江流出豫章萬里征途行絕險一
經世澤勗諸郎翟門賓客今非昨彭澤田園舊已荒早卜
庚泥安丙舍墓門松檟蔭鸞凰

文章難送玉川窮三尺誰收爨下桐未死名心塵夢裏半
消豪氣酒杯中貂裘北地寒先覺雁帛南雲路未通梁木
摧頽山色改五更鼓角聽悲風

山館唵雲圖寫贈同年顧南雅侍讀兼題截句
偃笠松杉屋後坡恰逢佳客倚筇過一聲落葉夕陽暮詩
思碧雲深處多

書同年陸祁生孝廉繼輅詩稿後

君詩出至性叩彈超凡音不襲風雅貌自摠忠孝心銜恩
結寸艸春暉愛兼金夜半慈烏嘯庭柯翳層陰十年塵海
客駕牡馳駸駸不藝稷與黍匪戀纓與簪修名慰顯揚皇
穹鑒微忱惜抱楚人璞終闕天府琛春風萬花谷不到修
竹林飛樓立縹緲浮雲蔽元霧戢茲晨風翼願爲反哺禽
繞籬杞菊花秋釀開芳斟試讀感士篇憫此遊子吟江干
駐車馬有客煩招尋浩然起高歌韻答江上琴江水不可

極君心共此深

自題松廬仙隱圖卷贈同年陳石士侍御 用光

虛簷入雲氣隔牖落松影是名禎仙廬清涼絕人境泉聲
萬壑喧山意太古靜千春藥艸香一壺日月永亮哉羲皇
人端坐風儀整素心兩忘言元想特高迴橋旁倚筇叟足
音惠然肯餌芝得奇方疑義乞造請亭臯有脫葉秋懷逼
虛冷堅我學道心眠茲圖中景

喜汪厚夫侍御至京

別君過半載離慄積雲水夢想見容光會合懽覲止相看
太瘦生去晷疾馳駛君髭微染霜我近脫一齒君年屆半
百學道協坦履宦途歷巉巖素位平若砥我年比君少早

衰乃若此握手嗟歔歔但視明鏡裏萬緒繞衷曲欲語從
何起憫我索居苦招我入寓邸棐几度我研深杯酌我醴
詢我南中書家計麤料理兒子稍知讀君心惻且喜君嗣
委課經植學務根柢文藝互商榷縱譚涉子史僮僕盡顏
熟鄉語話桑梓長安米價貴歲儉更倍蕝孤雲得所依青
山破愁壘涼風高樹林簌簌撼牕紙短歌載賡答幽興殊
未已

丁丑七月至都門喜與子履相晤贈之以詩

汪彥博

我不贈君江干拔心艸贈君谷底同心蘭心同天地
皆衾裯心異楚越膽與肝風吹楊柳玉樓畔露濕梧

桐金井闌美人折花感遲暮當臆瑤瑟愁不彈鳳飢
孤吟自矜許秋期遙待青琅玕五湖鷗鳥各分散相
逢與子多清歡黃金如土買馬骨豈有國士埋儒冠
盧龍塞下動懷古詩骨雄秀逾噴吮莫嫌廣文一官
冷日照先生苜蓿盤君歌將進酒我歌行路難百年
行樂強自寬長庚明月秋耿耿南山白石夜漫漫

顧南雅侍讀畫蘭歌

湘江帝子彈瑤瑟恍惚神遊象香國畫手東吳擅顧雍妙
寫蘭心與蘭質仙資亭亭俗豔空有意無意天然工真珠
簾卷玉鉤墮千花一笑羞羣紅嫩芽細撥銀鉤小麝墨螺
煙自縈繞映帶爭看取勢妍縱橫會得忘言巧翻思昨夜

醉停樽露臺獨立吟黃昏翩其僊袂御風去花氣爲我留
詩魂畫蘭人本蘭臺史品格幽蘭足相擬滇池艸色綠靡
蕪遠駕星輶采芳芷秋江夢君水一方碧城杳靄雲蒼茫
嫣然花容隔香霧愛而不見心旁皇燕臺高吟夕陽暮閒
情別有滄洲趣君還翰墨興飛騰我已容華迴非故惠我
清風拂素牋蘅皋幽思倩君傳好與美人奉作佩墨華如
醉潑湘煙

北遊篇寄示徵璵

正月渡江淮二月歷齊魯三月抵幽燕倉猝賃市廡髮亂
飄蓬麻面垢漬泥土鞵線不及紉衣帶不及縷投牒恐稽
遲疾趨達禮部入場數晝夜天氣漸和煦袷衣畧裝綿薄

寒已可禦研思構文藝羞作雷同語落落頗自喜覽者競
推許擯斥孫山外失意徒悵懽我命天所賦顯晦造化主
雖遇明有司何術能玉汝謁選得廣文兩載計可補留滯
非善策還歸乏資斧既占良其腓復筮成其股芳春嘆遲
暮炎序過重午嬾爲襪襪子憚此河朔暑夜夢屢見汝似
與汝同處又憐汝在家勉強持門戶汝前來啟詞若吐復
若茹夢醒尙呼汝攪枕亂衷緒隔別三千里附書道修阻
六月廿九日汝書我始覩上言即出門嗽痰病未愈風霜
慎眠餐悶愁且寬紆中言家庭事無論細與鉅即言兒勿
忘不少越繩矩下言兒文章力求矯庸腐自恨識未充味
薄少含咀發函閱汝書三更剪蠟炬是夜秋聲來吹落西

山雨壁間號苦蟲牀頭窺飢鼠沉陰至再四誰與傾肺腑

隣鷄啼喔喔倦卧不起舞晨興晤賓朋譚舊迭揮塵周郎

及劉子周上舍日堅相依若驢馱徐公城北至徐孝廉元

城畢生亦踵武畢孝廉雖無濁醪斟賴有新篇賭健者有

董公獨自樹旗鼓董編修士衡冰雪文清俊邁徐庾陸孝

輅五六月之交藉此慰逆旅侍御越若來汪侍御孟秋月

初五慰藉殊諄拳高誼邈焉古是月始生魄移寓有定所

侍御延課讀授經析訓詰三子出謁師勵志圖進取應對

習鄉音入耳甚清楚飲膳飲鄉味絕勝市上脯願汝勿念

我我亦無所苦但苦去日多垂白無建樹生當

聖人朝不合老農圃我

皇仁覆物不冒遍六寓尙厯宵旰憂侑食樂不舉谷菴曠
其乾中田稿禾黍莠慝或逃網私憤切臣甫平生仕進志
豈爲慕華廡寰海長恬熙衡門樂終窶此願竟蹉跎壯心
半消沮酒酣歌莫哀抑塞藉傾吐汝年甫弱冠植學力須
努少弛防瓠落太銳亦莽鹵魯縞不可穿枉自挽強努驟
雨溝澮盈汜濫原不聚鳳皇翔蒼穹好自養毛羽汝能耐
我懷一笑酌清醕金臺涼信早落月聞清杵作詩附南鴻
遠寄江之滸望汝有報章吳雲渺延佇

西山秋望

山意削虛碧秋光涵太清天低平野樹青入夕陽城古寺
鐘聲晚荒臺客思生浮雲關路迴臨眺不勝情

燕臺醉月歌壽厚夫侍御五十初度

長安城頭月滿山晶光飛繞白玉環華筵高燈燦羅綺清
樽浮綠開心顏琉璃屏風水晶箔鳳管龍笙相間作酒樓
若造天津橋玉螭噴水潺湲落仙吏驂鸞朝上清鸕鷀杯
泛蒲萄春珊瑚紅鉤銀絡索詩夢夜落蒼梧雲洞庭歸帆
夕陽樹又見春風花滿路繡衣驄馬綠楊隄神仙別有滄
洲趣燕臺八月秋風香彩雲五色天孫裳紅箏檀板調鸚
鵡玉女青童引鳳凰碧椹瑤英產東海問君靈藥何年採
丹房玉液鍊三華結作銅槃珠百琲神姿海鶴九霄翔上
嘯天風入混茫卿雲靄照霈甘澤能使萬類熙青陽方丈
蓬壺望縹緲知君氣與青天杳秦松漢栢古時春綽約嬌

姿艷芳艸何當冲舉脫塵鞅紺髮蒼髯長不老有約從君
五嶽遊未識婚嫁何時了

中秋無月以詩催之詩未成而月已皦然出矣殊
為快然

風號羣木搖涼空

大

怪底有風却無月一年秋氣正平分

汪彦博

寂寞燕臺兩吟客冰輪四抱雲朦朧

大

舉杯大喝婦

娥宮無乃老墓太欺我

博彦

潛彩不照琉璃鍾青山若逢李

太白

大

不從白玉盤中浴定向瑤臺鏡底磨青銅月兮月

兮汝雖不解飲

博彦

汝豈不能助我秀句羽觴底洗我堆阜

之心胸醉擲霜毫喚月起

大

欲吐未吐婉而美初如金粟

如來現半身

博彦

漸如洛濱神女涵秋水却為來遲影轉嬌

大須知愛劇心難死詩人呼吸信有權

博彦

碧天飛出晶丸

圓雲鬢玉洞豁然闢

大

紛紛白鳳霓裳仙千年桂實何有

蠹

博彦

太清不滓光華全明星如珠手可摘

大

收拾君囊當

酒錢五十年前當此夜

博彦

余以八月十六日子時受生

三更斗氣凌奎

躔

大

落葉

蕭瑟亭皋際秋心入遠天征人勞轉戍名士老參禪紅澹
遠村日青浮墟里煙嬾呼僮掃徑寒月照愁眠

客夜雜吟

蝨簡摩挲夜達晨苦蟲細語聽酸辛心香一瓣千秋業飯
顙山頭戴笠人

蕭瑟江關庾信哀悶愁難藉濁醪開秋鏡孤館風聲裏
鼠空牆去復來

鷓鴣天高夜氣清燕山獵火戍樓明朔風吹入三更柝
不
是江南落葉聲

古寺龍從入望迷黃榆歷亂白楊低寥天何處飛孤鶴
更
在西山落照西

荒臺弔古淚霑襟對酒歌成激楚音駿骨自深知已感銜
恩不獨在黃金

喧闐輪轂九衢通刮目塵飛十丈紅北地秋高天不雨
重
陽惟有滿城風

一聲吹笛出鄰牆夜燼缸花客斷腸怪底月光斜更曠不
知鴛瓦已飛霜

宣武城南賦索居罷彈長鋏嘆無車閉門莫笑嵇生懶要
藉閒身好著書

同徐桓生上舍

述虔

劉蓀林明經

應鈞

徐秋士陸

子鍊兩孝廉集飲西城酒舍時桓生將之任邱

南雁天涯逐隊飛旅情秋思兩依依浮沉未醒一生夢去
住無端萬事非野坂青迴樵客路夕陽紅入酒人衣明朝
又聽驪駒曲望斷孤雲隔翠微

懷沈狎漚孝廉

欽裴

奇氣酒邊來天空眼界開九章經世學兩漢濟時才京國
招賢俊斯人卧草萊珊瑚釣竿樹落月照蘇臺

宣南話舊圖歌爲陸祁生同年作 有序

丁丑三月余與祁生同客京師宣武城南居停相距數十

步晨夕以詩文相質在座者董編修 國華 沈孝廉 欽 裴 畢

孝廉 華珍 往來過從情話懽洽旣而董君奉諱南行畢往

保定沈歸吳門落葉寒花酒闌人散而祁生亦別我去矣

瀕行屬作宣南話舊圖卷卷長三尺有奇濶一尺五寸圖

仿吾州染香庵主設色法圖中西山遠翠松柏蕭爽女牆

層堞在隱現間城邊老屋數楹葛巾栗杖落落四五人不

辨誰某皆曠放瀟灑若有出世之想祁生命裝池用古錦

綴面素紙接尾載歸行囊廣徵題詠以誌鴻爪余自諸君

別後詩情畫意不知其何以闌珊而至於衰廢也碧雲在

望舊雨不來燈下懷人尊前溯別後之覽者可以感焉

祁生與我宣南遇乞我爲作宣南圖秋聲難以畫圖肖萬

樹一片雲模糊我將畫君故園溪山好亭榭梨桃榆柳涵

平蕪對此可以供清娛不然置君樓臺金碧千門裏玉勒

金鞍少年子玳瑁雕琴七綵裝美女名都粲玉齒更思縱

筆寫陰山勅勒高歌破敵還仰接飛猱搏蒼兕戰馬飲血

猩紅斑萬象雲煙變虛幻過眼丹青失轉盼故人無恙舊

時顏來往宣南十年慣宣南春花紅繡茵停車走踏京華

塵宣南夏木叢煙嶺消暑同爲河朔飲擊筑舞劍狂且豪

欲以奇氣吞荆高倒鈎金蟾出杯底夜半銀河淨如洗浮

雲胡然翳太空天外忽墮枯桑風青山蕭寥酒人散君亦

竟作南飛鴻雪泥蹤跡類如此留取丹青續畫史不烘水
墨繪江村不寫春城艷桃李棄繻灰盡壯時心老去英雄
肉生髀邱壑惟傳真性情松栢貞筠贈知己長短亭邊落
照微宣南我亦海羈遲知君一權煙波濶定有游仙招隱
詩

和厚夫侍御九日長椿寺僧送菊

風物九秋新秋花不笑貧冷香曾供佛傲骨亦親人古寺
尋詩客蕭齋落葉辰餐英娛此夕同葆歲寒身

厚夫侍御復以詠菊三首見示卽次其韻答柬

送花僧不俗伴月得幽姿艷絕霜前色青生雨後枝寒英
全晚節春卉悵芳時詩老多佳興千秋香艸思

處士柴桑里西風杖策尋清談開笑口冷趣入秋心簾卷
人同瘦宵闌酒更斟悠然好山色不辨白雲深
節候傷遲暮茲花晚更榮秋懷披灑落野性抱幽貞刻燭
青搖穗聯詩綠剪橙馨香滿襟袖足慰旅人情

書遺山詩集後

君不見甫也諸侯老賓客驚人詩句乾坤闢同時海內主
騷壇惟有江東狂李白浣花舊宅藪寒蕪四百餘載青山
孤中州野史亭巋峙高壘上欲摩成都慘澹龍蛇日爭鬪
禾黍西風哭東狩少陵老淚哀王孫共此呼天切補救大
定明昌第宅荒開元天寶江山舊傷心千古兩詩人苦吟
各爲滄桑瘦閒閒公似嚴使君溪南老如鄭廣文文章知

已互傾倒交遊意氣干青雲草堂後有遺山集性情不借
才華龔坡翁放翁兩大家鼎足三分竦而立涼雨蕭蕭落
葉哀秋燈如豆一編開蒼雄骨格幽并氣變作風聲萬馬
來

九月廿五日曉起對雪

策策風搖籜蕭齋睡起餘冷光苔畔滑花氣菊邊疎細溜
侵簷濕流雲落幌虛殘秋寒意早已似仲冬初

連日對雪有作

孟冬纔二旬瑞雪已三白昨宵灑紛糝墀廡厚半尺騰
窮巷毗占稔來歲麥今夏旱魃驕秋苗槁不碩 九重
厘民瘼輸租免常額賑賚開神倉編戶霑闔澤陽氣大地

廻

帝心上蒼格祥和捷感召調劑藉羣策所賴封疆吏膏雨
勞郇伯一民或失所試問誰之責重雲蔽陰厓朔氣滿荒
磧載賡黃竹謠愁殺梁園客

雪後卽事次厚夫侍御韻

萬花銀海盪空明畫本營邱妙寫生月榭試翻瓊樹曲風
簾微動玉鉤聲鴻淹泥爪行蹤沒鵬射寒眸醉膽驚羨殺
深山高卧者閒身留伴白雲畊

黃香鐵明經 釗過訪寓齋論詩卽題其讀白華堂

詩集

海內詩壇久寥落大雅何人擅著作江山風月自千春對

酒吟懷嘆誰托嶺南復見陳屈梁黃君才望高詞場滄江
倦客混人海論詩邂逅宜南坊我居巷南君巷北蹤跡天
涯笑偏仄憐我苦吟少吟侶開徑懽然見顏色我識君顏
乍摻袪我讀君詩頓忘食讀君金臺弔古篇爲我胸中吐
抑塞讀君俠客健兒行我欲從君走絕域男兒三十不得
意筆硯何能苦相逼但須痛飲作狂生不碍科名久沉抑
長安裘馬集貴游挾策可以干王侯兔園書生飽殘裘風
雲指顧登瀛洲咄咄怪事戒吟咏高天厚地呼詩囚名山
自享古人壽君毋惑此浮議浮君不見杜陵老大意轉拙
白首浩歌彌激烈又不見建安綺麗不足珍太白平生志
刪述我慚繫日少長繩君幸搏風有僊翮雲龍萬里各相

逐嶺表江南兩詞客

李瀛門比部

鍾瀚

子喬學正

鍾潢

棣萼圖歌

雲間二陸今二李翰藻翩翩作佳士東風紅笑燕山春壓
倒千花燦連理文牕繡幕嬌羅綺絢染雲山畫圖裏對語
交花樂意濃莫笑閒官冷于水秋原秃樹經霜飽君家棣
萼花常好江東獨秀那許誇文章兄弟聯聲華泖湖八月
煙波濶歸櫂歌聲白雲過月夜新吟憶弟詩叢菊茱萸渺
天末聞道春帆江口迎玉鞭重指長安城瀛臺雙棲鳳凰
翼笙簫鼓吹皆春聲東鄰有奇樹屈曲虬龍形西鄰有異
枿密葉交青莖願作君家之棣華不作田家之紫荊棣華
兩枝如一枝紫荊時悴而時榮尺布之謠不忍聽豆萁本

是同根生

黃香鐵釧以林辛山孝廉家桂所著見星廬詩集

見示卽題一律柬辛山

昨逢山谷來相訪示我逋仙數卷詩南海才應空北地秋
江花不鬪春姿幽并風雪三更夢粵嶺雲煙萬里思歲暮
天涯文字伴酒邊一爲展愁眉

汪侍御齋中分賦羊裘

深宵挾纈未成溫黯澹青袍轉尙存秦相功名新入夢嚴
陵煙水舊留痕寒禁北地三冬雪煖曝東方一綫暎博士
漫憐消瘦甚且堪貰酒醉黃昏

次韻答黃香鐵冬夜獨坐見懷之作

天清開月鏡地白起霜稜以子驚人句照余寒夜燈倚床
瓊擁鐵呵硯墨融冰文字因緣結居然有髮僧

原作

鎮平黃釧

街靜月無語檐虛風有稜思君如古佛枯坐對寒燈
老眼飽叢帙冬心涵瘦冰蕭條賓館意我亦澹於僧
寒夜盼家書不至李十一樞部涵剪燈溫酒爲余
遣悶余以足疾未赴明日以詩見貽疊韻柬謝

李侯衡宇近癩病晤言遲霽雪澄寒色清風誦好詩道心
開衆妙春氣得先時酬句慙枯管宵闌耐苦思
旅食京華久家書驛路遲浮沉半生夢甘苦廿年詩渚月
圓輝夜山花破臘時感君燈下酒慰我客中思

顏孝廉 以煥 次香鐵韻見懷疊韻奉答

君詩清濯魄珠斗峭捫稜相近招提境長明繡佛燈 君與余同

寓長椿寺側 鄰喧牆外柝僮削樹根冰破寂陪茶話何殊竹院

僧

臘月二十四日周小石 日堅 招同徐秋士 元潤 陸

範庵 模 集宣南寓齋食鹿脯分得五古限一屋韻

榆關日落風吼木亂卷黃沙打白屋醯鷄窮士嚙糠覈裘
馬高門厭梁肉問客無能客無好彈鋏風塵走僕僕長安
旅食大不易晏序流光去如鏃周郎飲我宣南坊不速三
人徐與陸蕉邊雪月天清寒詩夢三更漏聲續薄者炙鼎
滲晶鹽美臙行厨斫肥鹿綺葱丹椒和五味蜜勺瑤漿散

千馥盧龍舊傳熱洛河紅瀉臙肌灑淋漓魏侯若逢劉孝
儀鄴中食譜重披讀吻羣萃野餼笮燒尾筵開爲君祝
嗤我老饕恣飽啗大嚼屠門饜不足君言此味補筋骨枯
瘦憐余髣毛禿酸茹寒藜撐兩胷渴吸枵匏啜半菽腐儒
麤糲百年憂去壯來衰兩眉蹙歲云暮矣遣牢愁狂笑登
筵果其腹咬春獻歲開辛盤祠竈千家禱神福紅爐蒸氣
沃膏醪翠釜浮花盞陽煥鄉味雖思鱸膾佳絕勝家鷄與
野鶩請執牛耳登詩壇旗鼓中原走相逐

以野鴨生魚饋小石作歌代柬兼示秋士範庵

槎枒古樹茁冰蘂大地回春氣轉幹椒花蓬餌入良辰彩
勝桃符耀華閨燈搖九子蘭膏薰盤造五辛桂醬辣尊鱸

鄉夢悵關梁倦鳥南枝戀吳越魚羔膍鼈臠露鷄糝黍烹
鮮慰天末騰鶉或共鵠羹調膾鯉孰誇蟬翼割匹雛瘦若
野田雀魚曰作之凍凝沫餉君特爲索君詩險韻諸君醉
中喝浮生我類沙際鳥鍛翻何時塵罟脫魚留三星絕可
憐濺濺春流莫療渴籜籬之鷄尺澤鯢長此沉淪抱惋怛
節物關心又歲除片翼殘鱗共搜掇三冬旨蓄君自裕聊
佐壺殮渺圭撮長伴清齋菰糲供莫教真味酸鹹奪杯醪
力薄難盡醉刻燭詩遲易見跋自慚續脛不成鳧或笑祭
魚頗類獺

題厚夫侍御養泉齋詩集

玉樓仙人李長吉詩壇再世英光出昔駘虬轡迂緋衣今

上烏臺簪白筆

侍御會夢爲昌谷後身因作玉樓歌

江東甲第席華門早歲

文章受

主恩紫塞秋原盤隼鶴碧天春海麗鯨鯢五花

鳳誥宣綸綉百粵星軺建旄節玉署縹囊錦繡披炎州香
艸芝蘭擷筆驅風雨鬼神驚四十年來寫性情自許名山
留著作不求時譽達公卿海內寥寥幾詞客惟君足奪前
賢席懷古江山眼獨青側身天地頭先白鄉關桑梓話情
親水渚菰蒲訂夙因燕市狂歌干日酒艸堂舊雨十年人
君詩小謝同清發靈氣天閭御飄忽上窺漢魏接離騷沿
討源流樹風骨諫垣清切動高吟密勿平生補衮心一寸
丹忱無僞託千秋正始有遺音真靈位業儲才厚忠孝立

言垂不朽勒成雅頌協球鏞龍也納言皋拜手會昌一品
續新編我幸青雲附翼傳寄語滄江好風月相逢車笠溯
前緣

除夕立春

去歲殘冬茗上水今年除夕剡門山忽驚白日閒身擲又
報青陽令序頒半盞洗愁蘇病骨一燈和夢老癯顏賓朋
縱極他鄉樂親舊終憐會面慳

除夕聯句

天涯又除夕泥飲醉厭厭句捷爭义手陸元談雄奮戟髯
宜春金綴壁大合凍玉垂檐社鼓歲其有徐元街鈴夜不
嚴獸鑪心篆裊元麝墨爪痕黏爨撥焦琴尾大霜飛退筆

尖同斟祭詩盞元細檢讀書籤旅食虛垂橐元家郵密護

鈴駿臺名士價大靈瓊蹇修占索米愁方朔元炊藿愧伸

淹僧寮姜被樂元時余塵海杜冠嫌故里荒干絹大

清卿話一練艱難覓如願元刻劃累無鹽黍律寒回谷元

梅風煖入帘觴椒朋共集大梓菜食無兼縛艸窮應送元

傳柑俗可矻新年報鶯燕元憑景逝烏蟾蕊影搖釵朶大

冰斯炙研匳瑤華頻贈答元萍梗易安恬禪榻生歡喜天

花一笑拈元

蘊懷閣詩集卷第九

蘊懷閣詩集卷第十

戊寅

新歲吟

歲行不可追坡老之所惜今日是元日昨宵尙除夕千春
一瞬逝百歲寸晷積吾生無所好惟有文字癖詩存不滿
千生年將半百拉雜悔少作浮剽鮮實獲近頗耐苦索一
稿四五易不使閒歲月黃金虛牝擲春風飄然來吹我詩
鬢白新詩甫吟成新年已如客

春望

玉河水淺漾晴霞邸第樓臺麗歲華吹路暗塵飛作霧抱

林殘雪散成花 賜錢父老懽承澤種麥郊原喜放芽調
燮元功資宰輔免教暘雨動咨嗟

人日集長椿寺觀銅塔聯句

攝提貞孟陬歲序換僧臘大精藍郊轡憩韶曙朋簪盍周

堅温磨鬪丈室靈光燭華闔徐元五行制鉢龍千佛護鈴

鴿大範銅鬱嵯峨塗金繞匝堅日鏘錦七寶裝鏤盪一尖

合元替戾劬禿當剽棧戛鏗鞞大輝熒瓔珞垂吼聽蒲牢

答堅日慈雲遠周遮祥煙近振沿元嵐青空獨撐磨翠朽若

拉大壽宮天人姿水齋布衣衲堅日達摩甘露門玉女飛花

閣元蓮搖白鶴羽珠綴雙鳧大舍利放光明須彌涌稠

沓堅日會聞宮輦幸雲罕晻瓊釵元三輔苦曠稅九府侈獻

納大黃門暱豎刁綠衣嬖媢始堅日高皇闢洪基歷祺二百

卉元樸斲毀獲丹堂構壞茸闌大鋒鏑滿邊陲竿挺久騰

踏堅日毀佛昔鑄錢周宗道不雜元何不鏟琳華藉茲釜釀

軌大縻帑擲鉅萬浮屠架娑馭堅日靈刹閱滄桑福地轉蕭

颯元冷芒七星高曇華五雲飲大清遊賞良辰俊侶話禪

榻堅日思如繭眠蠶身肖羸寄蛤元菜把呼漆盤米汁戒攜

榼大三乘叩跣趺半偈禮挂搭堅日合十各讚嘆花雨墜香

塔元夜同顏編修伯燾黃明經釗醉飲李十一樞部涵

齋中

新年多酒病倦眼羨春歸不有素心友那能豪興飛閒官

花月夜野客薜蘿衣漏盡曉鐘動禽聲出翠微

漫成東厚夫侍御秋士孝廉

長安賓客滿友誼故鄉真意氣傾肝膽詩書慰賤貧燭銷
青髻影劍拂素衣塵窮達關時命休尋賣卜人

巷口寓公宅城南處士家月寒前歲雪風亂後番花禮數
虛文畧詩篇險境誇客中况味澹此樂最無涯

塵榻臨蕭寺霜鐘徹夜縱附書沉水驛飛夢落滄江廢簡
驅蚊蝨殘膏續半釭愁城高築壘不受酒兵降

時余盼家書甚切

燕九節厚夫侍御招同周庶常

貽徽

游白雲觀瞻

邱真人像

峇嶺琳宇枕郊坰雲氣迴翔窈窕屏三面城樓涵遠碧一

痕嶺樹削空青石床卧月馴猿鶴玉甃燒丹護甲丁欲向
長春問圭旨塵容多恐免仙靈

西便門野眺

匹馬西郊逐隊行玉鞭遲日麗新晴白雲倒向樹梢出碧
艸暗從城脚生槐市纔過試燈節豐臺已聽賣花聲來鴻
去燕知多少欲賦春愁竟不成

同龍子嘉修撰

汝言

集藤花館卽事

幽居遠市塵佳客去來頻簷霧不成雨園花何處春禮文
迎送畧詩卷性情真倚杖門前立邨農話苦辛

時方盼雨

喜徵璵書至

雨雪鄉關一年別車輪亂轉九迴腸可憐老至長爲客忽

報書來喜欲狂幾日酒懷生感觸今宵夢境得康莊蘇臺
煙水涵春色流照燕臺落月光

時與兒節
於吳門

書齋卽事

嬾逐金貂珠履遊書齋景物愛清幽未除文字三生癖聊
把壺觴萬事休晴雪滴花疑聽雨春禽啼樹若驚秋孤燈
夜半江南夢簑笠煙波一釣舟

春日書懷

冠蓋通衢騁列騶短筇扶病獨登樓一春醉眼驚華髮千
里傷心悔浪遊細草有香迷遠道野煙無夢落孤舟寂寥
世事兼身事振觸新愁與舊愁

四十餘年過隙駒半生心事付江湖白頭禿筆窮難送青
史名山道不孤人羨封侯誇定遠我慚著論號潛夫藿鹽
隨分消清福麤糲終身饜腐儒

東方索米計終非况復長安值歲饑中渚但看鴻雁集高
原何處稻粱肥村堤艸淺雲微護野館苔荒雪亂飛發粟
五城敷

帝澤負暄更見授寒衣

去歲畿輔旱災自冬十月至今春
二月上命五城各設飯廠賑

饑并給綿
衣四千件

斥堠風清免戍徭豫齊氛祲已全消却欣撫卹資賢牧尙
恐因循負

聖朝同谷詩篇餘涕淚春陵風景自蕭寥迺腸百轉愁千
疊酒半殘燈且自挑

連晨春睡怯餘酣紙閣風尖冷未堪花發胭脂吟代朔雁
迴書札話天南田園生計全非昨萍梗浮蹤百不諳聞道
江鄉多雨雪淮揚饋運困丁男

艸長鶯飛二月春輕陰漠漠正愁人花前風雨離懷觸天
末雲山望眼頻老矣一盤餘苜蓿依然十載倦蹄輪何時
便約江鷗伴水狎沙眠慰苦辛

李虎觀司馬輓詩

萬里滇池失故人十年宦海嘆沉淪不知涕淚從何落尙
冀傳聞或未真山墅停車吟杜牧竹湖投轄憶陳遵君居
之竹湖南墅己巳秋余寓君齋共訪吾谷楓林以詩酬倡謝公絲竹多悲感柳絮風飄
黯愴神生香閨媛君之愛女也詩詞妙絕適武林何氏旋以病天君在滇中聞信傷悼因之得疾

黃香鐵劍有獲鹿之行匆匆未及贈詩別後作此
以寄

愁聽驪駒送別歌留行無計悵如何依人王粲雄心少避
俗虞翻傲骨多雪點燕山澄霽月風寒易水咽春波青鏡
展取君詩讀夜夜精芒出太阿

聞雁和厚夫侍御韻

寒沙曾印跡春渚又呼羣余亦江南客偏從薊北聞五更
醒遠夢隻影逐歸雲辛苦關山月年年來往紛

二月十四日大風

花朝纔二日忽作妬花風遠岫失空碧驚禽啼亂紅酒醒
殘照裏春老軟塵中閉戶成余嬾朋箋隔未通

徵璵書至勸余來春勿復赴試早息影於首蓂盤
中且云科名得失無足介意惟名山著述其樂爲
無涯耳璵兒年少不應作此頽散語然見地頗高
且其爲我計者甚善因作此以答之

隔歲不見汝見書慰老懷清輝千里共遠夢一鐙偕靜裏
道心定澹中詩味佳不須怨搖落香艸葆根荑

門祚嗟如此清芬恐墜今衰遲困衣食羈旅促光陰浪走
成吾老飛騰望汝深莫嘲譽兒癖爲切紹弓心

觀長椿寺所藏明烈皇生母孝純劉太后圖像

寺內

舊藏明神宗母李太后九蓮菩薩及莊烈帝母劉太后圖像今所見戴毘盧帽衣紅錦袿裳者乃劉太后像也寺僧誤指爲李太后

花影瑤臺第幾重珠林春闕孝純容生綃吹落瓊鈎響夜
雨蒼苔夢濯龍

環珮春風出世姿午門法駕跪迎時絕憐信邸乘龍日哀
慕長銜寸艸思

玉階寒月澹斜暉莫辨丹青是與非瀛國太妃蒙詔問捧
香含淚認依稀

跨鳳前身證佛因當年畫苑紀庚辰官娥頭白談遺事零
落秋槐淚滿巾

楊椒山先生祠

前朝忠愍宅片石諫書留花艸自春色風雲生暮愁三年
冤獄具九死國恩酬抗疏非沽直平生廟社憂

題徐桓生述處居庸覽秋圖

塞艸飛沙白關榆落葉黃角聲五更壯秋色萬山荒匹馬
遠行客危亭古道旁愁看南去雁恨不凍蹄方

雜詩

崔崔薊門山上與青冥連物表覽神秀願言升其巔飛廉
導旌旆中道傷遷延縲馬倚閭闔曖曖翳夕煙豈不羨扶
搖會合固有緣浮雲幻朝暮變態殊萬千

春風東方來枯樹吹作花胡不改霜鬢鬢雲媚容華高臺
集衆賓廣座杯流霞樂酒在今夕吾生固有涯夕陽墓門
樹松楸噪歸鴉當年貴游子羽騎馳駟馭

名都盛歌舞繁會紛五音妙采炷羅繡雜佩鏘瑤琳宛虹
曳長綏白馬銜黃金騰山與赴壑躡景馳駸駸芳原一縱
目雜英茂春林信美非故鄉愁懷故難任蕭蕭代朔馬啾
啾越南禽代馬逐我影越禽憐我心

愁思苦煎迫心旌日搖搖吉凶問詹尹筮得睽孤爻我生
多疢疾廿載顛沛遭門祚嘆衰薄骨月異地遙爲巢慎陰
雨戴山憐僬僥已矣勿復道淒然淚清宵

驅車上修坂我馬行不前元黃病難起骨幹弱可憐嗚咽
聞哀嘶何忍重加鞭長楸翳落日驚沙吹滿天風髮與霧
鬣顏色慘不鮮驂駒困伏軛失意在少年期汝遇良樂養
此毛質全

季子歸洛陽翁子守會稽多金跪倨嫂驟貴羞故妻世態

固如此抑鬱安所疑男兒重志節違戀組與圭拔劍中夜
起喔喔聞寒雞

堂前生芝蘭堂上雜荆杞深恐蔓艸滋芳華損其美毫毛
不早拔致勞斧與錡衆芳易蕪穢惜此桃與李愁絲逐飄
風繚亂不能理

讀史覽興廢邈焉憬前修胸中不平事鬱此萬古愁忠孝
遭罪放信義召謗尤蒼蠅混黑白獨行宵小讎盛采忌炫
飾潛璞歸貞幽籠禽毛羽推霜雪哀啁啾羨彼雙黃鵠高
飛凌九州

春遊駕駟驪顏飾誇美好眼見新少年心念舊耆老天天
園中桃萋萋原上艸旣嗟春風遲又感秋霜早西山古松
栢貞心不枯槁

屈靳異忠佞同朝事君王蘇李合情悃乃在天一方仰首
望河漢蟾蜍蝕晶光昔同衾與幃今如參與商人生百年
壽半爲憂患傷何時太行山崎嶇化康莊

衆口亂訾讟燦金累清修能忍終有濟勝剛莫如柔南山
殷其雷晴曦變昏幽鳳凰失所托下與鶉鷄遊德輝覽而
下置網不誤投

馮唐仕郎署白首嗟沉埋揚雄識奇字投閣晚節垂高名
遘物妬才望基禍胎正聲叩宮角瓦釜難爲諧江河揚其
波洪流渺無涯秋風吹締綵淒其傷我懷

次韻答徐孝廉

元潤

細雨孤燈起嘆嗟一編脈望舊生涯補天欲煉靈媧石貫
月難逢海客槎秋水閒情沙際鳥春山倦眼霧中花五陵
衣馬金門客拜袞人呼鄧仲華

玉臺秀句絕塵寰孝穆風流庾鮑間滄海源頭皆活水匡
廬面目是真山才鋒儘許千軍掃進境還嚴一字刪樗散
心情憐退鷁藉君靈藥砭慵頑

越水吳山雁跡分天涯別路夢休文三年浪走違鄉國千
里神交戀故羣許我歲寒盟皓首勗君才望屬青雲異時
車笠如相憶周北張南話梓枌

漫梳蓬鬢學曹婆青鏡年華喚奈何空有客陪捫蝨話更
無人問飯牛歌萋迷柳巷春光少蒼莽榆關朔氣多醉檢
篋中殘畫藁綠波江上釣魚蓑

終風三章

終風狂且暴卷我屋上茅牽蘿不及補綢繆空爾勞不念
鬻子閔爲鳴復爲鴉天寒日色薄黯慘長林梢勗茲鳳雛
翼雲中任飛翺

終風陰其霾損我田間麥折穗萎深黃抽萌失新碧已孤
望歲懷枉見雪三白撼地轟成雷汗田曠無澤近淚灑乾
土顛天訟風伯

終風太無情推我園中花傷彼艷冶姿飄蕩落誰家非無
向榮意爲爾彫容華不思扇陽和千里揚塵沙殘英剩晚
馥惡爲護紅紗

香鐵自獲鹿寓書兼示移榻東軒之作疊韻三首

答寄

卜鄰居數月短榻話長椿之子不相見落花何處春酒腸
三斗熱生計一瓊貧誰與慰離索天涯氣味真

芊緜江店柳蒼靄楚南椿覽秀洗塵目新詩含靜春名山
遠游富旅食著書貧喜得君消息郵緘字字真

近闕東軒好扶疎陰老椿屏開千仞秀綠借半山春吾道
關時會斯人豈賤貧鹿泉寓公地未許久棲真

鍾仰山學士

昌

齋中小集兼柬周小石

日堅

陸範

庵模

二子淡旬別相逢各黥然客途新著作鄉夢舊山川談笑

空千古團欒共一瓊庭前花木好應識主人賢

風霾篇

一春苦久旱九埜飛黃塵孟夏月初八降旨賊見聞清辰
日無光亭午炎如焚薄暮天色赤千里蒸火雲黑風東方
來咫尺不見人倏疑入幽都長夜無昏晨蟄龍不銜燭暗
壁搖鬼燐忽聞山之陽雷車震殷麟慘澹天王旗虎豹叫
九闔長林掃霾霧微茫辨殘曛陡若天開子重見人生寅
粵稽五行傳咎徵非無因

詔書求直言曰咨女羣臣二十有三年朕爲天下君其各
體朕意敬天而勤民南臺應

明詔諫艸拜

紫宸曰臣昧死上忌諱不復存我

皇理萬幾宵旰深憂勤民欲天必從民富君不貧政體挈
綱領治絲乃不勞細故勿苛察小廉何足云宮庭侍密勿
問誰掌絲綸衣鉢受和老布被嗤平津模稜習巧宦疲玩
甘因循何以答

恩寵媿此佩與紳煌煌諫官疏剴切動

至尊

聖心遇災懼精誠感蒼雯乾惕厲无咎震躬于其鄰下蘇
小民困上答皇天仁浹旬甘雨來燥土輒可耘二麥雖不
揀黍苗漸懷新乃知天人際感召疾若神郊原一覽眺生
意來欣欣虛牕客夢破簷溜滴夜分晨擁山萬綠快酌

干巡紆此杞人憂樂此閒中身

館中有紫藤一架因旱半枯前日得雨藤花復開
詩以賞之并邀主人屬和

百日望雨雨不來老藤枯死無新荻焦皮剝蘚苔蜷局生
意婆娑安在哉輕寒野陰翳庭樾太息羣芳此消歇誰知
薄潤灑林梢已入花心浸花骨初見槎枒發嫩枝漸看紫
絡已垂垂東風護花有深意看花不怨花開遲主人近日
詩頗少憂旱心情怒如擣今晨一笑醉藤花我亦因之接

離倒

端午日陸子鐵

元文

以詩約續去歲江亭之遊尋

以憚暑不果次韻賦答兼示諸同人

平生不作祭神澆酒船頭買入蜀經蠻不言苦又不能折
腰低眉事貴倖沾丐壺漿漬泥土山中薜蘿與蘅杜落落
疎星各三五霜豪秋兔不盈寸手接飛猱射猛虎挑鎧重
讀去年詩懷抱蒼茫孰傾吐青山三百六十日夢與孤雲
共軒舞忽而塵事苦刺促負此騷壇風月主火雲壓山飛
鳥絕坐使清氣隔臟腑招涼難買徑寸珠譚語紛陳五雜
俎空有青驄倦驂駟竟無綠義浮鸚鵡江亭無乃少顏色
何處更覓神仙侶諸君聚散如搏沙我已風塵老終窶鏡
中白髮休自笑却喜飄蕭貌漸古年來頗肖宗少文溪山
卧遊續舊譜白雲自愛野鶴性無奈樊籠困冲舉陸機文
賦亦何用與子長安作窮旅我雖未續前歲遊子已新詩
萬人許要使鴻爪印泥痕不爲鷓鴣風感鍛羽

雜歌

有酒復有酒何能洗此胸中愁壁間古劍知我意天陰日
暮風颼颼男兒識字憂患始青天無情人白頭太行崎嶇
虎踞關惡灘惶恐魚吞舟翻雲覆雨變昏旦誰披肝膽懸
清秋仲連九原如可作我欲從之東海陬
北風吹落日投林之鳥啼黃昏東風動春冰出水之魚浮
綠蘋物情欣戚異所遇造化賦畀無平均亮非達士慕齊
物誰與返樸歸其真百年光陰若逆旅忽而隆冬忽炎暑
欲問仙人王子喬不識名山在何許
嚴霜不能改松栢淒風可以摧芝蘭瀟湘美人怨遲暮芳

情惜此榮華殘蘅皋落葉暮山紫憔悴秋容有如此欲折
蘼蕪寄所思隔斷天涯一方水

庭前有好鳥百轉工春聲林間有名花澹冶香氣清可憐
東風三月暮夜雨淒其愁五更一鳥失侶百鳥皆哀鳴一
花搖落百花損其榮明知芳春代謝若逝水中心惻愴何
能效彼太上之忘情

一杯之水瀉地不復收一寸之影燭盡不復留王侯將相
竟安在纍纍冢墓蕪荒邱嗟哉勞生縛塵鞅形骸雖具骨
先朽生年未半百白髮亂垂首百憂攪其心萬事掣其肘
嘗聞五色煉石天可補世上元無女媧手

金臺久荒蕪郭隗不可作路逢相馬者自稱良與樂驂驪
騶裹一日可以走千里胡乃十步五步氣已弱識途老馬
空爾爲戀此場苗與場藿飾以白玉轡控以青絲絡一朝
放棄山之陽野犢村犁卧溝壑古來盛名易被造物妬何
况虛名那可攫

談笑動人主博取卿相尊縱橫師鬼谷彼哉儀與秦蘭生
真奇人三寸之舌可以推強鄰毛生雖自薦公等碌碌因
人成事非其倫侯門食客三千士爭繡平原貴公子黃金
萬鎰壁百雙姓氏寥寥著青史

韓非抱孤憤虞卿老窮愁古來著書人易遭謗與尤獨行
傲儕俗貞白矢潔修窮年守陳編兀兀不少休遑知身後
名能作斯須留君不見倉頡作字鬼夜哭從此文人少庸

福

玉京十二樓綵帳芙蓉鮮中有白兔所擣之上藥青童所
奉之琳編塵心細若髮一縷夢魂不到蓬山顛蓬山之高
高接天日色欲暮林生煙欲遠舉而無翼時延佇而迴旋
雄鳩鳴逝太佻巧不敢從之入青杏

讀後漢書作

世祖建武初久旱損麥麩詔令中都官三輔出繫囚和帝
永元中秋稼稿不收雒陽理冤獄甘澍膏田疇京房紀災
肯賢聖滋殷憂恒風厥咎霽弭變勤懋修郡國察利病鰥
寡咨鞠謀漢治尙近古君臣省譽尤廟謨協羣策靈臺迓
天庥

光武紹炎祚孝明恢皇綱永平之九年蠶麥書豐穰報功
肇殷禮始議巡南陽北至祠舊宅章陵潔丞嘗六飛幸南
頓三老拜道旁校官肄雅樂笙鏞發鏗鏘本無醉飽心而
猶戒禽荒皇考昔有訓父老誌不忘十年復田租天位憂
靡常奕世廣孝思沛澤洪無疆

天象示譴譴九重降明旨百寮上封事四聰聽甚邇吏黠
不能禁人冤不能理惟其矐于心遑復逆于耳直哉鍾離
意免冠諫天子有詔勅大匠北宮役遂止危哉宋叔庠執
義不畏死駁議剪羣疑風烈重青史同朝諸尙書叩頭伏
不起庸臣好將順自古盡如此

對雨小飲聯句

新涼蘇病骨驟雨作秋聲大不作世間想并忘身後名汪

博一尊誰主客萬物幾衰榮太悟得彭殤等愁髭自不生

博彦

送厚夫侍御出守青州

一載慰離索又聽征馬嘶諫官賢太守雄郡古青齊防海

霜輦肅看山蠟屐攜循良二千石富范政聲躋宋富鄭公

俱守是土

祖帳都門設賓僚送遠行一麾圖報國五馬重專城舊

俗憐凋瘵新猷仰勵精待聞考最語足慰故人情

嶺南梁孝廉吳奉祖諱南歸詩以誌別

一去燕臺畔麻衣瘴海邊親朋齊涕淚風雪滿山川引我

別離恨愈深文字緣謝公述祖德珍重讀遺編

黃霽青太史安濤招飲西城寓齋以使黔集索題

漫成六絕句

好山不厭百回尋可識先生相士心澗艸溪花遍搜採秋

林過雨屐痕深

涪翁山水擅清才况是星轡奉使來誰道黔中名勝少飛

雲洞靈境隔塵埃

辰龍關色鬱青蒼百丈晴絲石路旁不知馬首向何處石

題辰龍關句也齊唱使君新樂府獠童苗女踏歌忙

玉屏行館冷斜陽繫馬亭皋路正長欲續離騷賦山鬼王

將軍墓艸花香先生有玉屏

試院更闌蠟炬明
茱萸九日酒頻傾
不知何處鄉心切
玉尺樓頭夜雨聲
先生有玉尺樓
坐雨憶弟之作
盤飧鄉味剪葵菘
邂逅金臺笑語濃
君是昌黎我東野
未妨狂態逐雲龍

寓齋晚菊呈大庾相國戴可亭先生

別業城南路蕭疎
煙水潯書齋宵漏永
花氣曉霜深疊石
青排闥流霞翠滿襟
晚香寒不散珍重魏公心

題馴鹿莊圖寄退菴黃丈

凱鈞

小築溪莊屋數楹
丈人農隱足平生
客停落日渡頭權
詩入碧天雨後城
索酒鄰翁餘野趣
啄花巢燕共閒情
高陽宅里清芬遠
誓墓非誇著述名

老樹柴門結蔭濃
綠蘿深處白雲封
更無人話世俗事
儘有酒澆塊磊胸
爲愛展書多賞析
莫嫌投刺太疎慵
山中歲月芒屨健
笑倚仙人九節筇

對雪柬劉芙初太史

嗣綰

自識劉公幹論交我悔遲
江東文士傳鄴下
建安詩日短
歲云暮官貧懶不知
蒼松西嶺雪心與古人期

東盛子履孝廉卽題其近藁

陽湖

劉嗣綰

孝章自昔得清名
歌詠朝朝見性情
比興多時詩境遠
可知懷抱自天成

蒼寒跌宕見遺山
近體從容大厯間
忽憶家書真切語
盤中苜蓿勸君還

蘊懷閣詩集卷第十

蘊懷閣詩集卷第十一

鎮洋 盛大士 子履

已卯

正月三日曉雪出西直門至海淀

遠岫雲如幕侵晨雪作花
鞭絲寒立馬髯影瘦飛鴉橫
嶂紛飄絮迴風亂卷沙冥濛
西嶺色深樹酒帘斜

雪夜新霽宿大庾相國海淀別業

北闕 恩光近西園霽色清
萬花寒不落虛室暗生明
蓮箭深宵轉松醪衆客傾
僕夫催曉發更作玉山行

都下春燈詞

絳霄鈞籟譜鸞笙禁苑春開不夜城
八萬二千修月戶水

晶簾幕玉簫聲

乳茶桐酒擅芳鮮
熊白鷺黃列綺筵
捧出攢犀香盒子
迴龍紫玉暗生煙

輦航藩服輸琛賚
左右賢王錫賚豐
嶽拜嵩呼齊舞蹈
無疆

聖壽頌延洪

角觥超驥技力誇
黃羊法酒出官家
魚龍曼衍陳階下
湧現吉祥如意花

晴樓璀璨五雲開
綵幔駢羅錦繡堆
惟有高句驪貢使
琉璃廠肆購書來

珊瑚萬穗簇香毬
西嶺彤雲夜不收
點綴太平真景象
百

神川嶽慶懷柔

星橋結綵流蘇帳
錦樹恒春寶相花
綰髻窈孃工度曲
象床醉倚拍紅牙

宣南旅舍晤周肖濂觀察

請聯

玉關萬里客戎馬
一書生檄艸掀髯
就詩篇义手成
十年空宦橐絕塞
有循聲却憶江干
月尊前話舊盟

吾鄉諸老輩與先生

訂交者今皆零落無存
詢及爲愴感者久之

大雪同孫明經

成彥

訪黃太史

安濤

不值作此以

寄

十日不見黃太史
輿到忽作城西遊
城西雪花大如掌
亂卷白沙堆破裘
孫登長嘯落天外
飄蕭袁戴真吾儔
主人

侵曉出命駕定有秀句奚囊收客來且作門外立恨無大白千杯浮春風正月倏過半花氣不上珠簾鉤鐙事闌珊五更盡六街寂歷無鳴騶漫天柳花忽飄盪片片吹入誰家樓林端翠微澹欲失屋角白雲寒不流江南故園梅信早夜半翠羽啼啁啾隴頭驛使問消息附書一洗鄉關愁何不僵卧老窮巷但食糠覈吾何求黃金臺下凍蹶倦梁園賓客慙枚鄒先生若歌郢中曲賤子更放山陰舟倘隨北海作座客莫笑東野爲詩囚杖頭攜錢約數百尖叉險韻重賡酬

和作

嘉善
黃安濤

子猷一去剡溪涸雪中誰復誇清遊道旁棄真東郭

履籬下寂寞王恭裘孝章要是天下士獨與古昔爲朋儔性情入世異冰炭四時清氣毫端收京華旅食忍寒餓鴻泥暫印萍蹤浮連朝滕六幻玉戲釣詩不啻珊瑚鉤招攜孫郎過茅屋勝似對飲呼三騶豈知雁燕巧相避未合水調歌瓊樓入春十日節候緩玉河不見冰斯流千畦宿麥浩一白檐禽覓食鳴啾啾憐余出門非好事僕夫蝟縮拳毛愁歸來振衣洗鞢韞足音三徑思羊求忽聞妙曲上繼郢儼若暖谷新吹鄒氈簾垂地石鼎響三間矮屋如扁舟孤羆豈願齧薄踞二鳥勿作樊籠囚瓊瑤滿街倘更踏凍毫雖秃猶能酬

大雪不止霽青太史薄暮歸寓招余小飲卽席限
十藥韻

春城鎖寒氣昏旦雪霰作玉戲天催詩同雲蔽虛霽振衣
交鬢髣躡屐亦灑落叔度故健者招朋踐前諾盤殮走覓
市酒錢罄搜橐座無雜賓混尊有清酤酌豪情引之飛狂
態那可縛六花繞庭除萬纈散簾箔冷輝劇相逼風力殊
太虐沙隄落晨雕紇干凍暝雀頗厭北地寒不如故鄉樂
風塵歎拊髀意氣尙如昨古懽幸會合壯懷藉開拓寸鐵
君不持白戰余恐却韻鬪一字險法守三章約掉頭興彌
高縮舌神已愕非敢參翱翔聊復博歡噓十觴罰不辭百
川汲而涸饒涎欲吞虹清嘯或警鶴重彈壁上琴屢報鄰
家柝四望瑤琨鋪一罇斤斧鑿林樞挂冰柱石筍淬霜鏐
熒熒坐牕鐙簌簌響簷鐸醉歸詩夢酣蕭齋慰離索

和作

黃安濤

入春厭人事鑪頭久無作豪情避喧呶逸興入寥廓
古廟書攤收鬧市燈火落已虛光廠游頗負登高諾
但聞車隆隆誰曳履橐橐無錢信慙懽有酒愁獨酌
盛子澹宕人不受世羈縛招之試馳箋惠然竟舉箔
爲言聲氣同敢怨雪風虐抖衣毳飄鷺入座暝噪雀
方圓不多陳冷澹自足樂新知得誠難良會幸補昨
塵中兩人閒胸次萬古拓高歌我何辭薄酒爾勿却
青雲任遭逢白首固要約彌覺狂言真遑顧俗子愕

酒闌共娑盤燭炮恣吟嘯待揚學海波坐挾詞源涸
知更莫如魚警夜願爲鶴侍立欹髯奴催歸惱街柝
乾坤夜氣嚴肝膽清境鑿破夢聞打門發函駮挺鐔
綠綺鏘鴟苙黃鐘殷牛鐸春風何時來彩筆迴蕭索

和張南山孝廉

維屏

遣懷韻時余將南歸

身世無須較重輕廿年貽誤是浮名書生自合窮愁慣吾
輩還期著述爭閒對殘編成獨笑幸逢詞客附同聲何堪
會合城南路又作關山匹馬行
吳山嶺嶠兩吟身氣誼文章若有神海內每深知己感天
涯豈少素心人村帘酒薄難成醉野館花繁不當春何處
客懷遣岑寂藜床茶竈得相鄰

同張南山

維屏

黃香鐵

釗

集小餘芳亭子分得五

言古詩一首

雲氣澹浮郭倒影落酒杯不知百年客亭中醉幾回我行
尙濡滯攜侶重徘徊忽疑故鄉樹青入西山來雜花半開
落清流自滌洄雖非境幽僻却少車喧厖身世托菰蘆魚
鳥不我猜真得放曠意眼界爲之開江山千里別暫此笑
語陪浩然發清興莫待斜陽催

同人遊小餘芳亭子四絕句

番禺

張維屏

出城頓覺碧天寬矮屋疎籬當畫看一輛小車如小
艇好風吹到白蘋灘

方塘戲鴨樹翻鴉四月江村景未差除却輪蹄與塵

土不知身尙在京華

嶺樹江雲惹夢思鶯花草草負芳時何期一笑逢吳

質重向東風話髣髴遇吳巢松太史見示新詩有髣髴雖換風情在之句

戴笠論交意轉真會難別易轉傷神怪他隄畔千條

柳只繫鄉愁不繫人子履將有歸志

小餘芳亭子晤吳巢松太史即次口占韻

吟鞭郭外偶經過村酒沽來醉半酣鬪草春陰何在苒養

花天氣尙冲和祇緣衢巷塵氛少已覺煙霞意味多一笑

吳儂作吳語惜無小艇唱漁歌

原作

吳縣 吳慈鶴

病起尋春春已過何妨買夏一顏酡芳陂鴨翅衝波

軟綠樹鶯雛命侶和漫士鄉心臨水動 帝城佳氣

傍山多髣髴雖換風情在不忘銅隄緩緩歌

黃小舟太史玉衡招同譚農部敬昭吳孝廉梯林

孝廉聯桂黃明經培芳張孝廉維屏黃明經劍集

竹垞古藤書屋分韻得屋字

涪翁餞我一尊酒索我新詩酒邊讀邀朋苦作十日留塵

詩甚患行期速城南尺五地清曠竹垞藤花舊書屋座中

嶺嶠集名流君更鄉音耳邊熟羅浮峯高瀉飛瀑萬頃松

濤互洄湫荒江詩夢十年符許我雲龍共追逐余最喜讀屈陳梁三

家集曩會夢游南海作羅浮歌茲在始信文章自有神此

都門得與嶺南諸君唱和亦奇緣也間會合寧非福可惜匆匆幾信宿整頓行驂戒僮僕遂令

別緒繞迴輪絕類此花繚而曲浮生踪跡千萬里身世真
如滄海粟不聞天上參商星長照杯中酒痕綠我將入海
隨煙霧君自摩霄引鸞鶴結想雲霞異地深加餐風雨關
心祝但使河梁有蘇李不必松陵亦皮陸紫藤垂垂風謾
謾空翠西山淨如沐金臺馬蹄走躑躅笠影鞭絲窮遠目
詩成獨立髣飄蕭諸君莫笑霜毫禿

同作分得夏字

陽春 譚敬昭

驅車出黃塵休沐得清暇言招散仙來一稅鞭鸞駕
盛集青雲堂古屋紫藤架軒軒尙霞舉宛宛欲龍化
疎花眷餘春接葉宜長夏陳迹屬新構荒池倚層榭
抗懷 國初老狎王齊盟霸騷壇朱與梁流風緬王

謝大隱來金門清暉若精舍雲虬勃然興笙鶴翩而
下聲氣有必求榮名豈旁借至今一毫芒日長千金
價高談氣益振酣歌酒方罷朋儕東南美離合光陰
乍徘徊送歸風淹留惜良夜百年來者誰歡遊動悲
咤

同作分得古字

香山 黃培芳

古屋鄰海波九衢得勝宇紫藤蟠清陰百年飽風雨
炎雲天際起小集共揮麈餘韻邈難卽今昔數易主
江海客同心萬里聚庭戶不樂深可惜此日足千古
豪素雜丹青 是日子履卽於座中作畫談諧暢樽酌澄懷觀衆妙
好風出高樹何當折芳贈明晨悵南浦

同作分得集字

張維屏

蒼藤三百年天矯古秀出花隨絳霞飛根學怪松立
當年竹垞翁日下富著述王查時叩門湯蔣數促膝
一朝餞藥亭離筵感蕭瑟吾曹聞而知老藤見猶及
古屋傳至今粵人此焉集今爲吾粵順邑會館相逢操土音仿
佛返鄉邑坐中江表客轉覺歸思惡謂子履此身忘去
留此會喜真率所憂膏尙屯未覩月離畢何時淦淦
雲暫緩杲杲日一雨慰三農嘉苗淳然茁熱塵耳目
捐清氣肺肝入旣解相如渴復潤文通筆 九重軫
黎元虔禱意專壹天心至仁愛甘露沛可必吾鄉亦
苦旱家書說未悉夜來有歸夢夢輒荷蓑笠茫茫人

海中自顧等蟣蝨平生所結念不在求口實蹉跎百
無補漸欲守蓬筮浩歌破羈愁古懷付新什回頭望
老藤轉類懶龍蟄

錢鶴山孝廉

之鼎

汪竺君孝廉

元爵

同集

鄭親

王邸卽事

一院夕陽裏哦詩大白浮賢王能愛士座客集名流園柳
綠堪折廡花紅尙留南歸尋舊夢猶自繞瀛洲

都門與諸同人話別

白雲曾繫故鄉心悔絕青山徑未深浪走浮塵憐失路倦
飛落日盼投林無多舊侶難爲別有約新詩且共尋欲訴
衷腸無一字只須濁酒不停斟

玉河橋畔草如茵滿眼鶯花足惱人獨立斜陽勞遠望忽
吹小雨洗行塵築臺每恨黃金少歸權空添白髮新記取
布帆無恙也不堪回首鳳城春

四月輕寒未換裘淒涼雲物似高秋絕憐越鳥三年侶不
散江關萬古愁逋客祇諳歸隱計冷官聊作爲貧謀西山
一片蒼茫色送却吟眸與醉眸

促柱么絃不忍彈驪歌頻唱且盤桓破除往歲名心易排
遣今宵別緒難京國去留皆失意天涯風雨各加餐何時
春水鷗盟續重整滄江舊日壇

已卯閏夏送子履南歸卽用留別韻四首之二

黃安濤

江南煙水入歸心非爲名場感慨深吾道未疑孤羽
翼此才端恐老山林儒官雖冷猶堪試春夢能醒莫
再尋珍重離亭無限意落花風裏酒同斟

雪中乘興記披裘冉冉流光又麥秋擊筑碎琴磨俠
氣歌詩讀畫洗羈愁一麾我亦行將去二頃君須早
自謀林下何時共幽討剪燈相對拭吟眸

子履孝廉將出都門以詩送別

順德黃玉衡

鶯花幾日眼中忙別恨還隨春恨長早識搏沙難久
聚獨憐抱璞尙深藏卜鄰我願同王翰艸牘人誰薦
孝章惆悵詩壇少牛耳那堪五字賦河梁

紫陌看花事已非高歌青眼送將歸共知材大難爲

用不到貴來方悟希靈鳳聊爲棲枳計翔鴻還望刺
天飛杏園消息遙相報莫戀春盤苜蓿肥

送盛子履孝廉歸里

丹徒 錢之鼎

鎮洋先生盛子履文章震動公卿間青衿向老脫不
得軟塵撲髻緇蒼顏往昔相思未能見幾度都門終
隔面今聞例得冷官作苜蓿盤開傷鄉縣匆匆行李
擔半肩布袍托落將南旋奎光照入磨蝎命鱸堂一
片仍寒氊可憐吾友劉蒼林天涯三載抱病深功名
夢斷故鄉遠欵眠破屋空呻吟同里偏君往來數藥
裹駢羅爲叅酌長途足繭飢腸廻坐到城陰日垂脚
先生之行不自由蒼林臨別心黯愁先生欲行雙淚

流欲行不行且復留解裝探篋空敝裘出門徧與朋
好謀東尋潞河先買舟停鞭款戶笑語劉我今直與
子行耳旅懷忽暢病可瘳竺君徘徊爲揮涕汪竺君有送行
序陸子神飛慕高誼謂子鐵男兒有才同不第助君扶
持定歸計北風吹帆大船走到家門前挂秋柳月滿
平湖杯在手

端午日津門舟次用丁丑集陶然亭韻答陸孝廉

元文 劉明經 應鈞

連床聊遣客懷孤懶散心情倩酒扶嵐影乍從空際合車
塵漸喜此間無一痕水浸干堤柳五兩風迎十幅蒲節候
驚隨蓬鬢改閒來且繪卧遊圖

舟中話雨聯句

一身無長物歸夢入煙濤風雨當今夕江湖共此心陸元士大臆
 鐙饑鼠瞰匣劍瘦龍吟海近岼容澗山遙雲氣深陸元士沙
 痕浮野色人語雜潮音轉漕來成市連檣望若林陸元士前椿
 移禿樹後柁沒蹄泐風豈驕帆鬣泥偏困壑鱣元文斷橋橫
 絕澗窄港閼層陰赤壤平疇衍黃河故道尋元大歌憂瓠子
 决錢枉水衡侵萍梗嗟離合桑田變古今元文策終懷賈讓
 檄暫擬陳琳時蓆林抱病故元却癘符縣艾延齡籠貯蓼元大
 先秋蘇病骨避俗滌煩襟吾道貞潛璞朋交幸盍簪元文川
 涂思渺渺脾喉信沉沉堪嘆相如倦裝虛買賦金元大

天津橋酒樓歌

有客招我天津遊與我共醉天津樓長橋如虹高百尺對
 此豪興凌滄洲蓬萊山頭海雲吐飛入空濛半樓雨紅闌
 六曲酒幔青燕姬琵琶趙女箏陽阿歌發柘枝舞曼睩醜
 顏嬌不語美人遺我雙佩璜僊禽忽下天風翔神光離合
 不可近欲渡海水愁無梁青山畫圖一放眼天上明河水
 清淺狂客如逢李謫仙有酒且酌杯中滿

丁字沽

維舟丁字沽返照入平蕪野岼碧無盡水雲青不枯酒村
 喧賽飲魚市易償租借問遠行者何如垂釣徒

青縣雨泊用竹垞韻

小雨暑不洗客心愁益紛遠山平楚合一水直沽分海氣

卷簾入潮聲拍岸聞鄉書消息斷天末盼吳雲

曉發東光縣用竹垞韻

蒼茫平野望草色亂青袍海日收殘霧天風起怒濤荒隄
川路杳古壘陣雲高恐有哀鴻集矜人孰告勞

東昌懷古

師行兩日讖先成燕啄王孫大厦傾鼂錯立功罹赤族謝
安坐鎮悞蒼生將軍已奉勤王詔孺子猶存叔父名廢壘
荒寒餘戰骨城濠流出斷腸聲

阿城進牘遇順風作歌

入秋已二旬天氣尙炎酷南風五兩阻歸程欹枕倦卧苦
捲局忽聞林木動颼颼曉起風利舟行速水門狹止容一

船曳尾魚貫諸船連十人九人拽巨索飛鳥陡落波中天
待牘行行復止止飽挂輕帆自今始世途順逆本無常欣
戚無端乃如此秋風送客勞勞亭齊州九點青山青遠郊
無人日色澹白楊颯颯雲冥冥問我何爲去鄉國俯仰身
世憐飄萍歸期屈指九月近無事便合柴門扃柴門落月
三更夢風雪天寒笑開甕

分水廟

伯勞飛燕悵分離讀曲橫塘待月遲欲把郎情比流水愁
懷付與弄潮兒

濟安臺

濟安臺畔古松龕樹色青迷屋後嵐十里陂塘荷葉雨初

秋風景似江南

濟寧舟次

高柳動涼思，衰荷生遠香。水浮人影碧，岼迴夕陽黃。客路秋將半，愁心夜漸長。篷牕欹枕卧，飛夢到江鄉。

夏鎮

征帆飛鳥外，落照亂峯間。天地秋聲肅，江山髣雪斑。孤燈殘藁削，空篋敝裘還。千里鄉關樹，青冥約可攀。

行過嶧縣望充徐諸山

萬壑隱靈秀，層嵐變態奇。山川環魯甸，風雨蝕秦碑。獨有遠行客，正當秋霽時。孤桐翠微合，涼韻入吟思。

八月晦日自都中歸作詩示璉兒時余將莅山陽

學任

家書寄京邸，書至當暮春。入夏理歸計，買舟辭析津。川涂歷邈綿，屈指過十旬。仲秋之晦日，清晨達吳門。三歲不見汝，見汝含酸辛。汝婦悼徂逝，汝病還纏身。執手各嗚咽，淚落同沾巾。收淚作笑語，漸漸安心魂。一歸釋百憂，萬事何足論。理我頭上髮，拭我衣上塵。開我篋中書，勸我盤中殮。盤殮問誰辦，謝汝館主人。暫留信與宿，消此酒數樽。秋風卷簾幙，仰望新月痕。百里婁江水，鄉樹環煙邨。一櫂夜抵家，懽會呼朋鄰。三徑雖就荒，叢菊依然存。家人坐團欒，情話忘晨昏。弱女髮垂肩，幼兒頗能文。挽鬚競嬉笑，不忍加怒瞋。汝亦愛弟妹，藉此娛衰親。居家甫一月，命駕淮水濱。

家累苦牽率亂絲治益勞從行獨賴汝趨侍夕與昕朝謁
韓侯祠暮尋漂母墳春潮射陽湖新綠波粼粼枚生故宅
荒煙浦餘殘雲七發療汝疾一望怡我神此邦地雖瘠官
冷休嫌貧蘭茝不蕪菱桃李懷芳芬游魚樂在沼鳳鳥招
其羣勗汝養鱗羽珍重爲傳新京華冠蓋盛吾意甘沉淪
浪遊絕後悔收拾滄江綸南歸自休憩此樂關天倫顧汝
一把盞陶然飫醪醇

示次兒徵琪

骨相憐渠弱文章喜不庸家貧當洒掃客至整儀容里塾
囊書慣師門負笈從親朋勞誘掖誇美謝超宗

吳門曉發留別黃亦宋茂才

景濂

卽題其近作詩

卷

文采不外露性情殊俗流無雙江夏士高詠故園秋客權
河隄沒危檣霧氣收別君淮上去莫散酒邊愁

留別畢季瑜丈卽次送別韻二首

擲揄道路笑儒酸樗散應慚稱職難未改寒氈勤課學久
虛塵夢懶求官綠陰門掩蓬蒿徑清味盤分苜蓿餐白首
故人勞慰藉一尊風雪盼江干

射陽湖畔水雲居擬卜田廬學種蔬多恐河流爭似駛忍
看廬舍盡爲魚纜拋席帽驚秋晚又挂蒲帆逼歲除買賦
黃金何處覓文園淪落病相如

送子履赴山陽學任

畢憲會

送君此去朔風酸聞說河流道路難肉食纔堪爲俗
吏素心端合作儒官秋濤八月枚乘筆淮水千金漂
母餐試向月波樓上望吟成星斗夜闌干
學舍舟居是陸居盤餐苜蓿當園蔬未妨杜甫嘲梁
肉莫測黃公市坐魚地近鹽城終瘠薄歲逢澤國仗
蠲除由來治事兼經義安定規模豈不如

江上晤董琴南編修次韻答東四首

長楊誰解薦雄文鍛羽天涯失故羣吳會鶯花頻憶我江
關風雪又逢君荒隄滅没干邨屋野樹微茫兩岼雲夜半
扣舷狂起舞酒邊懷抱許同分

淮北危隄築未成蓼花洲畔石梁橫拍天水抱魚龍氣卷
地風摧木葉聲同話萍蹤當歲晚相看華髮更愁生期君
一展匡時策莫戀名山學向平

升沉時數杳難憑我已名心冷似冰礪礪胸懷千日酒零
殘詩卷一孤鐙游魚只解潛淵樂逸驥齊誇上駟騰獨有
窮交風雨共許聯皮陸賦松陵

篷牕吟緒爲誰撩瓜步山容入望遙江口夕陽橫北固石
城遺恨話南朝朱門廢壘憐巢燕粉堞高樓夢射雕車笠
他年重會合題詩莫負片言要

原作

董國華

尊酒宣南記論文三年江海竟離羣匆匆小艸渾憐
我落落寒氈差慰君人事共誰商未雨心期敢自托

閒雲只餘夙尚留山券寄語煙蘿席願分

寒逼孤篷夢未成清懷寓感便縱橫中原已抱其魚
痛四野驚聞有雁聲往日老謀求故道祇今前席爲
蒼生艱難正是吾曹事與爾高歌寫不平

聚散萍蓬若有憑蕭然形跡證清冰鶯花韋曲三春
夢風雪江干並舫銜愁裏文章仍跌宕眼中流輩儘
飛騰新詩字字匡時史風格沉雄到杜陵

回首鄉園別思撩春暉深護艸心遙自綠菽水干微
祿終覺漁樵負 聖朝碧樹三霄曾借鶴高雲千里
欲盤雕平生期待卑溫飽肯爲浮榮誤久要

舟行雜感八首

烏榜腥風撼怒流東南民困費持籌山城嵯嶇千條瀑水
國村廛一葉舟拜爵有人謀納粟上書無計善防秋哀嗷
中渚悲羣雁梁肉豪華耀五侯

千檣估舶萬邦通赤紫江南郡最雄內府空頒錢幣賞中
原誰奏決排功鼉鼉亦厭濤聲惡魚鳥猶疑地脈窮搔首
天閭雲漢隔詩情付與亂流中

十里朱樓廿四橋霜隄楊柳曳枯條攬衣欲坐中宵月拍
枕俄驚兩岬潮棲樹鷓鷯思飲啄處堂燕雀任飄搖魚梁
鐙火連瓜步南望江關路漸遙

秦郵堰障聽潺湲滅沒蒲帆落照間古樹雲平如覆掌遠
山天霽乍開顏巢居到處民廛少水滂頻年物力艱身世

茫茫誰共語祇應長伴白鷗閒

朔風淒緊雁來初倦倚蓬牕夜檢書橋影一篙新岼插水
痕三尺舊田廬繡衣使者巡行徧玉幣陽侯禱祀虛聞道
長官勞濬淪肯隨太史問河渠

直北關山接莽蒼桑乾湍急慎隄防高原煙嶼層城沒平
地風檣一葦杭榆葉雲容逃塞嶺竹枝水調似江鄉舊時
駿馬臺邊客觸撥愁懷酒半觴

少學雕蟲愧壯夫中年身事更疎迂生花已斷江淹夢橐
筆偏工鄭俠圖鄺注偶誇輿地熟杞憂曾補漏天無狂瀾
欲砥中流柱管見書生笑太愚

閒來戢影廣文瓊料理園中苜蓿盤只恐心情多懶癖底
嫌風味太寒酸侯門客散千金易市舍人謀一飯難差喜
談經兼課子一燈唵徹漏聲闌

射陽學署有懷彭甘亭

綠陰門巷兩家春風雨無端別恨頻淮上暫栖將倦翮天
涯仍是未歸人誰傾肝膽稱知己不賦窮愁亦愴神二十
年前吟眺地放翁團扇墨痕新

甘亭於丙辰丁巳間
客淮距今二十餘載

學舍題壁

岑寂荒齋一冷官送迎禮數本來寬閒消濁酒春前釀靜
倚孤燈夜半殘倦羽也應嚴擇木苦蟲豈合慣號寒侯門
大有吹竽客迸斷朱弦未肯彈

蘊素閣詩集卷第十一

蘊素閣詩集卷第十二

鎮洋 盛大士 子履

庚辰

陳雨峯都督階平以戎政芻言見示作歌代柬

國家承平二百載盡鑄劍戟歸耕耘綢繆牖戶未陰雨卓
哉惟有陳將軍談兵決勝千里外紙上拂拂生風雲變通
古制訓車戰推挽趨捷驅飛輪隻輪小車峙糗糒裹載甲
仗聲殷麟每輛上設連床弩旁貫鐵索垂輪困籬障六尺
寬五尺生牛皮草纏其身怪鴟巨獸繪五色列陣鱗次成
城闐踰岡陟嶺絕險阻所至萬馬齊騰奔悲風蕭蕭白日
暮天地慘澹飛黃塵河水寒嘶傷馬骨草枯蓬斷沙無垠

將軍訓練勤撫循乃與挾纊同其温憶昔鹽臬胸海曲馬
陵山下傳寇氛四千餘人踞古寨如蟻集陣如蜂屯官軍
緝捕冒鋒鏑營壘徹夜嚴防巡一麾奮臂賊股慄下馬羅
拜驚天神爭投兵械鳥獸散惡梟盡化爲良民干城倚毗
天寵渥

賜翎晉爵銘殊勲淮東移鎮威望著投壺儒雅何恂恂一
編戎政備蒐採將軍嫺武兼能文嗚呼安得將弁盡如陳
將軍作詩敢告同官聞

題陳都督

階平

投械歸農圖冊

有引

雨峯都督爲海州參戎時捕緝私販甚嚴一日猝遇梟匪
聚衆抗拒乃大集兵士面授方畧更番迭戰羣醜皆望風

披靡俄有劉廷燕等叩軍門呈繳兵器願歸爲農都督許
之未幾投械來降者相繼不絕境內肅清州人繪圖賦詩
積成卷帙庚辰之春余在淮上都督持冊示余因作詩以
紀之

梟馘游氛靖海隅盡歸阡陌勸輸租共傳楊僕新持節曾
識終童舊棄繻芄野露濃春挾纊柳管風細夜投壺從今
褒鄂功臣像合繪郊圻勸稼圖

答訪程禹山孝廉

虞卿

不遇

憶曾花下啟蓬扉長者停車話夕暉袖裏詩篇期共賞客
中蹤跡易相違園禽漸識春聲轉庭草初含雨意肥道左
若教重邂逅折巾風過認依稀

達厚庵茂才麟題予所畫春山花嶼圖次韻答東
翠微深樹隔花溪紅雨繽紛望眼迷吟倦有人眠未起曉
鶯何事盡情啼

次韻酬李少白茂才續香

慧業前身擅捫胸星斗高文章真氣骨才望古賢髦乍爾
交傾蓋温如醉飲醪感君風誼篤珍重贈言叨
太白驚人句平生我鑄金青山自終古絕調少知音一字
推敲細十年甘苦深非君共商榷誰識起衰心

雨牕書悶

盡日陰雲布冥濛霧不消花容生黯慘風色太蕭條詩卷
留天地親朋嘆寂寥韓侯釣臺下蔓草綠圍腰

河伯靈誰乞支祁久逞狂鬼狐形變幻妖魅讖荒唐近聞武陟
工次訛言繁興洪澤危奔注長淮患預防至尊勞旰食何日
莫懷襄

穀幣輸官府功名奮遠猷亦防名器濫暫釋度支憂聒耳
聽嗷雁關心問喘牛如何賢宰輔先事失綢繆

鷓鴣聲不斷聽雨攪愁腸索處成余懶招羣笑客忙荒墳
漢漂母古廟楚元王曠世心相感臨風奠一觴

禹山孝廉招同達茂才麟田茂才純春許茂才肇

祁集飲文津書院歸賦長句奉柬

淮陰寓客程夫子足跡蕭然遠塵市厚庵居士大雅羣約
我放櫂來文津田生許生亦勝侶講院春風劇笑語座中

懽會盡素心盤殮未熟杯先斟主人豪興自清發不飲何
爲醉兀兀海內文章絕等倫江關詞賦仍蕭瑟憶君晞髮
扶桑東澄海樓上垂晴虹一朝掉頭不肯住釣竿夢拂珊
瑚紅僕亦諸侯老賓客酒徒燕市生悲風江湖淪落三十
載留此心跡千秋同卽今同作南歸客君亦垂垂鬢痕白
春草重尋漂母祠秋濤何處枚生宅鉢池山翠環煙汀渚
蒲淺白榆葉青狂花滿屋落片片時鳥繞樹鳴嚶嚶酒人
醉歸日色暮重覓扁舟問前渡願借溪頭釣石磯結宇從
君此中住

子履厚庵梅溪繫溪集飲文津子履爲作文津雅集
圖並繫以詩卽次原韻

天長
程虞卿

此生合是煙霞子却厭小人居近市廿載飄零旅雁
羣倦飛息羽棲文津賴有聯吟韓孟侶妙諦著花花
解語新知幸更得同心春迓蕭齋酒漫斟子履先生
清興發過訪詩篇畱突兀小艇重來抱一樽天邊仙
樂聞瑤瑟惠美醞並
示近製銅絃鐵板大江東驚看吐氣垂
長虹酒人擊節發狂叫叵羅一吸珍珠紅西園公子
亦磊落笑談幽襲叢蘭風於此慷慨復弔古吹臺當
日毋乃同清尊小聚天涯客歧路看人雙眼白南村
莫話柴桑居草堂不是花溪宅與君策杖行蒲汀好
倩妙手傳丹青就中繪友得友趣風詩伐木歌嚶嚶

回首林陰日將暮相送移舟向前渡圖成省識畫中
人一片煙雲容我住

春柳用漁洋秋柳韻四首

短長亭畔繫吟魂映水朱樓晝掩門夕照昏黃微弄影遠
山新翠澹畱痕渡迷桃葉疑無路里近柴桑別有村朝雨
渭城歌送客笛中幽怨與誰論

穆穆青鬢未成霜十里長堤半畝塘燕翦乍垂金縷帶蝶
衣剛展翠雲箱楚宮歌舞朝還暮江表風流謝與王離恨
若教春縮住冶遊重問大功坊

掃眉才子綠綃衣午睡春慵舊夢非花塢雲深鶯語細水
簾風定客來稀六朝故苑層陰合三月輕寒小雪飛漫羨

靈和恩寵渥軟塵十丈素心違

愁絲無力最堪憐冷節家家說禁煙池館幾回閒徙倚旗
亭一色共芊緜浮萍水面餘陳迹芳草天涯悵昔年孤負
噓枯春信好綠波南浦碧雲邊

六月二日招朱礪南紆成盥蓀儔邱月樓彬達厚

莽麟李少白續香李子莊友香同集學舍之一枝

巢分得五言排律二十韻限身字

倦翮淮陰市巢栖冷宦身世稀青眼客座有素心人氣誼
諸君重行藏賤子陳雄心拊髀肉浪走困風塵月自他鄉
白花非故里春飄零老王粲頤頤病崔駟詞賦哀箏氣亭
臯落葉辰一帆江渚口半載射湖濱吏隱甘岑寂匡居守

賤貧裴王門巷近嵇阮笑言親北地聯今雨南村訪逸民
成仙琴韻古邱氏錦箋新一李無雙士高歌並入神呼兒
弄柔翰逃暑醉清醇逕曲蟠蒼蘚簾疎引翠筠陳蕃應下
榻王翰許爲鄰儘可忘形迹何須辨主賓遇窮能作達道
屈敢求伸鵠譽誇羣俊鷗盟證夙因酒懷爭跌宕洗盞酌
千巡

暑窗卽事三首

寥落不成宦疎狂與俗違豈煩詹尹卜已息漢陰機逝水
流光速晨星故侶稀蹉跎年五十始悔半生非
火織炎官赫衣冠懶詣人好書隨意檢涼氣入懷新徑僻
青藏樹簷低綠倚筠何須執扇障却少庾公塵

一椽官舍冷况味野人家桐葉引秋爽榴枝餘晚花牖通
雲氣入幔卷月鈎斜夜卧星河迴如乘博望槎

得黃小舟侍御宿古藤書屋見懷之什次韻答寄
愁裏光陰客裏過酒懷難遣悶懷多偶吟細雨簷花夜小
坐清風竹石坡淮北河隄驚有雁江南澤國嘆無禾日邊
書札勞相憶破涕緣君一放歌

黃小舟侍御香鐵孝廉自都門南旋過訪射陽學
舍卽事成詩

一年風雨記分襟千里江湖托素心詩卷互看題歲月神
仙原不怨商參袖攜諫艸霜芒肅櫝韞明珠夜氣深去去
天南少鴻雁郵亭莫遣帛書沉

舟過淮安子履招飲於學署別後賦寄

黃玉衡

未向江湖作散仙已將臺省讓時賢一官獨喜攜蘇
過令子小三絕誰憐繼鄭虔卧樹輕雲詩老夢簷花

細雨廣文瓊琅玕个个環虛室絕似藤陰話去年

風雨沉沉暗驛亭高歌神鬼入孤城側身天地詩篇
在極目江河涕淚橫感事憂時如漫浪清尊白髮話

平生明年淮水重相訪一聽停雲大雅聲君近輯停雲歸雅集

爲香鐵題天際歸舟圖

繫纜津亭訪我廬一尊餞暑早涼初臨行不敢傷離別爲
聽慈烏想倚閭

李少白齋中同人集飲分賦淮陰古蹟余得宴花

樓晚眺五絕四首

宴花樓唐時郡太守宴新進士于其上見山陽縣志

繫馬大隄上醉宴南樓花夕陽城外樹春色落誰家

長安雪作花淮海花如雪何物作酒籌一枝爲君折

東華人倦遊倚杖一登樓芳草窮遠日夕陽生古愁

棠梨野人扉甕頭春釀熟別開牆角花亂紅滿茆屋

少白齋中分賦萬柳池七絕二首鐵嶺 達 麟

載酒無人往聽鷓鴣棟花風過畫樓西祇今煙雨空濛

處省識當年舊柳堤

荻葦蕭蕭正暮天落霞還照隔溪煙關心最是蘆汀

雁迢遞南飛又一年

秋夜懷盧蓉湖明經

湧

卽題其詩藁

開卷得知已識君恨我遲深嘗甘苦味獨寫性情詩老樹
枝無醜一瓊寒不知三秋淮海月長繫別離思

君館
海州

寄程禹山

虞卿

對此一庭月如何不憶君天寒孤客夢星散酒人羣秃筆
老猶健狂名我欲分蒼茫寫懷抱憑眺鉢池雲
海內爲長句先生筆有神江湖銷壯志風雅得傳人呼飲
儕邨叟幽栖遠市塵天將閒歲月付與著書身

出郭偶感

清淮水千尺寒照月光皦韓祠旣榛莽枚宅亦荒艸纍纍
道旁墳子孫幾家保上有古松栢虬枝環十抱似聞地下

語羨爾蒼顏好疾飈卷林籟啾啾亂啼鳥匪具貞勁質柯
葉摧頽早人壽不滿百百年亦易老海上芝九莖容華不
枯槁

答寄陸孝廉

我嵩

見懷二首

閒身但覺酒腸寬冷澹心情老一官三載久經離思積今
宵忽展尺書看每聽絲竹傷懷易欲合雲龍會面難憶昔
春明君話別落花如雪馬蹄寒

衰遲無意戀名場料理裙襦退士裝薄宦豈應嫌落寞狂
歌仍欲逼青蒼鷗羣夢繞三洲樹鶴俸貧分越宿糧高詠
君詩望星漢似聞天半叫鸞凰

望雲圖歌爲范茂才

學誠

作

范松江人
客于淮上

飛嵐一片青欲攀煙鬢滅沒虛無間出我胸中自具之邱
壑畫君眼底不盡之雲山雲山千里渺莫辨定有詩夢歸
江關恍對庾公峯隱隱又聞圓渚流潺潺黃葉村邊夕陽
暮此是君家釣遊處遠樹長縈別後思舊堤記得來時路
去年花發淮陰城布帆不動春雲平何事流光感遲暮白
蘋兩岬秋風生鱸魚作鱠尊作羹饒頭家釀杯中傾天涯
節物非故土高秋雲氣殊淒清我家紅樹溪雲裏只隔吳
淞一江水客裏相逢各黯然望雲共引鄉心起一幅秋林
淺絳圖似聞漁唱出菰蘆閒雲合向溪邊住我亦煙波一
釣徒

寒夜偶成次禹山韻

澹白光凝屋角霜宵闌虛室暗生芒不風木葉自蕭瑟有
路星河空莽蒼四壁苦蟲吟卧榻一鐙飢鼠竄鄰房思君
應覺清輝減紙閣寒多漏正長

壯心都付水東流鑄鐵誰教合六州一夢纔醒青玉案十
年早敝黑貂裘扁舟擬釣寒江雪遠道休登落日樓三徑
已荒時序晚且餘花色上簾鉤

散髮翩其下海東生涯禿管蠶書中已迷汗漫騎鯨路莫
怨差池退鷁風寒氣慣撐詩骨瘦豪情肯放酒杯空遲眠
試倚中庭月寂歷荒齋似梵宮

曉行

唱曉村雞遠近聞寒潭猶照月平分卷沙地撼層城樹釀

雪天低雨岼雲策蹇何人同索句出林有鳥自呼羣奚奴
負笈勞行役濁酒沽來且共醺

喜成盥蓀儁重至淮陰小齋過訪卽事成詩

江上青山管送迎相逢重把舊詩評最憐秋燕仍爲客却
喜寒鷗不負盟到處煙雲畱畫藁經冬竹栢見交情別來
夢雨扁舟夜愁鬢新添雪數莖

風誼如君古處敦素車馳唁淚聲吞每隨病馬悲嘶影又

聽慈烏愴斷魂

君寓李少白齋中
時少白丁母憂

急難友生盟白水寂寥

賓館話黃昏匣中劍缺寒芒肅珠斗中宵手自捫

南河聞說靖狂瀾猶聽風聲湧急湍卒歲頻年生計拙感
恩一飯古來難經霜細草愁絲結傲雪疎花倦眼看除是

貧交晨夕共只須高卧學袁安

浮沉羈宦故交稀補屋牽蘿願已違江樹那堪淮浦望渚

鴻况近夕陽飛無聊我暫開蓬徑不速君來扣板扉隙地

新鋤寒菜好酒邊爐火醉同圍

柬蕭棣生明經

光裕

湖海爭傳穎士才十年懷抱爲君開相看風雪殘燈夜同
嘯蒼寒古釣臺翠袖應憐倚修竹青衫未合老荒萊寂寥
門巷車塵少只愛尋詩策蹇來

一畦寒菜綠陰稠莫問英雄幾豫州酣酒敢辭無算爵狂
歌欲上最高樓江湖心事芒屨在吳楚雲山畫藁收君亦
工愁類吳質相依畧似水邊鷗

錢鶴山孝廉自都下南歸訪余射陽學舍卽事賦
贈

涼風天末動愁思握手驚看兩鬢絲
遠別音書經歲隔倦遊情緒一燈知
生涯我尚營羈宦歸計君須問釣師
北固山青江月好可能招隱寄新詩

曉起尋鶴山於西城旅店

沙隄艸淺淨無埃郭外人家戶未開
千里鄉關愁思積一天風雪故人來
漫憐好夢全非昨自合名山有此才
宿鳥林端垂翼去閒身肯許共追陪

招鶴山小飲學舍卽送其歸京口

未肯平原十日留且傾濁酒暫澆愁
銷魂黃葉斜陽樹送客青山古潤州
京洛風塵蘇病骨江關雲水洗吟眸
天寒莫嘆貂裘敝好景奚囊句盡收

千金亭懷古

一飯猶思漂母恩杯羹甘受是何人
窮途感泣因知己國士功名足悞身
亭長南昌慚拜賜君王雲夢僞行巡
酬金不負平生諾鐘室含冤竟莫伸

同人小集一枝巢餞禹山孝廉歸石梁

鷗羣水國夢蒹葭節物關心感鬢華
草草客中爲地主勞勞亭外卽天涯
平臯笠影雲如墮遠岫鞭絲樹欲遮
歸去若教逢驛使一枝花月正橫斜

青蘊紀夢詩八首爲焦茂才

承秀作有序

青氈紀夢一編射陽焦文甫茂才所作夫其蓬門寂歷屋
小子舟蓮箭迢遙鐙昏如豆月沉沉而韜彩風瑟瑟以生
愁四壁聽蛩數行走蠹未除綺想聊托夢遊情方顯而彌
深境以真而愈幻贈汀洲之芳杜遠別誰憐問山上之蘼
蕪故人安在銀河昨夜路隔紅牆桂楫何年槎迴碧海千
圍步障艷歌則玉笑蘭啼一掬珍珠哀感則香枯竹裂生
來仙骨具裁雲鏤雪之思僕本恨人彈促柱么弦之響庶
幾睠懷靈瑣共此素欹凝望華胥同深愴况云爾

別有寒生翠袖邊且將感遇續游仙流黃慣織迴文錦伴
月閒尋種玉田何處紅牆勞遠望每臨青鏡悵華年座中
執戟誇夫婿走馬章臺亦可憐

梔子簾前曳珮璫梨雲一枕想衣裳當壚酒熟娛長夜有
國春來集衆香神女故應居洛浦遠遊何事怨蕭郎情癡
欲鑄金爲屋恨少明珠十斛量

綠綈字點墨痕新前度瑤池會列真傳語東皇遲授簡捧
心西子早工顰只因花睡濃于酒贏得春愁細似塵憶昔
橫塘曾問訊垂楊繫舫去來頻

掃眉才子女尚書合伴相如賦子虛蕉色青餘香吏案桃
花紅到謫仙居新聲北地工瑤瑟舊院東風走鈿車日出
城隅樓閣曉使君五馬立躊躇

未須投筆羨封侯仕宦金吾志易酬無那鶯花江渚晚又
驚風雨茂陵秋柳窺青瑣和煙織草濕紅心滿地愁付與

哀蟬吟落葉一生情緒爲勾留

似聞廣籟奏雲咸內殿昭儀捧玉函花色瓊瓏天女珮春
痕黯淺酒人衫傳來樂府題長信是處瓊樓署隔凡坐久
不知紅日暮畫梁雙燕自呢喃

闔苑層城路未遙飛來靈鵲自成橋但看溝水流花片不
信鮫人染絳綃黃竹女兒箱疊錦綠鬟侍婢玉吹簫縱教
金粉歸空色綺業平生底肯消

艷曲新翻子夜歌闌干斜倚奈愁何舊時流水行人去遠
道傳書好事訛春兩青青河畔草秋風嫋嫋洞庭波尊前
大有飄零感如許容華瞥眼過

以羊脯饋盥菘并贈以詩

樵蘇不爨荒齋冷博士熒熒抱孤影饋食誰分公膳雞圍
爐漫說官厨餅山膚豢豹臙且腴朱門上客謹歌呼三星
躋首鮮可飽腐儒畧潤枯腸枯道逢成連東海客願築糟
邱浮大白羝牂熟作吳羹和以酸鹹厚肥澤吾曹口實
惟自求補牢悔不工營謀騎都尉與關內侯觸藩羸角殊
堪羞但得園廛聊補葺三百維羣荷蓑笠歲時伏臘招親
朋草草杯盤慰岑寂君不見秦相功名五穀皮中年憔悴
憶烹雌何由醉卧黃梁熟叱石山頭遇牧兒

題陸春堂

從星

空谷足音圖

陸生澹岩人隨分愛恬適心如古栢青眼任俗子白朝辭
鍾吾城暮爲射陽客避地計亦踈集木慎所擇幸托親串

家素心慰晨夕梅花仙眷屬偕隱蓬蒿宅白駒賁然來食
我場中麥足音下空谷渺與塵網隔樂哉圖中人心遠地
且僻披圖忽三嘆百感胸臆積猛虎藏深山潛蛟蟠大澤
君今何所之身世太偏仄危岡蹶輪蹄長林鍛羽翮黃河
波浪險變幻在咫尺跬步豫防患風霜戒行役此間大可
樂况得友朋益千尊四座傾一笑百憂釋毋吝金玉音荒
齋竚移屐

鉢池山丹竈

不辨神仙蹟煙光入杳冥雲迴千樹碧山削一拳青乘鶴
去不返吹笙何處聽長松風謾謾我欲借清冷

開元寺枸杞井

止水一泓碧僧房十笏寬釀花香聚液滴葉露生寒石
層陰合藜床獨坐看延齡推上藥好共菊英餐

尋顯忠廟遺址弔宋開府儀同三司趙忠烈公立
一呼奮臂集流亡重鎮淮陰捍敵強諸葛空謀守綿竹賀
蘭無意救睢陽荒阡月落鼉鼉走古堞霜封草木香何處
顯忠畱廟食我來憑弔獨旁皇

過北神堰弔韓蘄王楊國夫人梁氏

織葦村民習土風當年宣撫駐淮東樓船汴水軍容墨桴
鼓金山戰血紅憂國癯顏消粉黛閉門蓬首泣英雄蹇驢
已赴刀環約黯慘旌旗落照中

厚庵招璵兒食臘八粥璵兒爲余索粥因復饋至

學舍作詩謝厚庵兼示瑛兒

清晨門甫開君家粥已熟兒子出舖糜頗稔吾所欲殷勤
爲君請一瓢亦已足伴來惠橐餽鼻孔餉香撲滿貯錡與
釜欣然果吾腹十年迫飢寒風雨破茅屋乞食吳門簫浩
歌燕市筑畀我一飯緣盤中此苜蓿聊辦腐儒餐不受黔
敖辱吾曹澹泊志羶腥獸梁肉君無二頃田僕無一斗粟
同登古釣臺形影慰熒獨西風砭肌骨僵凍苦拳曲殘年
圖一飽餘糧啜半菽倘剩杖頭錢更可醉醅醪料理五辛
盤詩會請復續

邱月樓茂才彬招諸同人集十一聲山房作消寒
之會分得憶梅七律二首

斗轉參橫繫我思水邊籬落記尋詩半林斜月懷人夜去
歲荒江話別時路識孤山春信早香銷紙帳客眠遲燈前
舊事多振觸冷澹心情竹石知

江南煙水夢魂勞翹首霜禽下隰臯綠綺聲中誰解語翠
微天末若相遭故園生意回殘臈驛路歸心折大刀竚想
容光慰疇昔星河遙夜共澄高

東坡生日招諸同人集一枝巢賦詩分得七律二
首用坡翁尖義韻

新詩百態鬪穠纖誰識坡公紀律嚴千古文章交有道一
生刻劃媿無鹽偶邀佳客開幽徑獨笑寒花倚短簷欲做
髯劉松鶴意酒邊呵凍試毫尖

東坡生日劉景文以古畫
松鶴爲壽又髯劉已到城

南隅亦
見蘇集

城垣樹色暗藏鴉窮巷紆回雪碾車秀句何人出寒餓高
歌有客醉風花殘年頗占清閒福壽世還期著述家禁體
聚星追勝賞銅壺漏盡手頻叉

一枝巢中招集諸同人作東坡生日適屠壽補明

經璜未獲在座翌日以詩寄示率成長歌答柬

赤水詩翁大雅羣天教玉局爲前身我居巷南翁巷北好
似無着逢天親鷓鴣巢栖一枝穩稱觴坡老之生辰圍爐
團坐十一人不辨誰主誰爲賓草草折簡不徧及翁意毋
乃微生嗔忽聞叩門響剝啄小奚馳遞詩篇新座中傳弓
誇衆客天上鼓角飛將軍髯蘇下手風雨快翁亦星宿當

胸捫詞源忽翻瘴海浪仙夢已落黃州雲孫莘老與劉景
文尚友異代通精神沉檀小像禮仙佛和南弟子心香焚
獨鶴南飛去不返髣髴清唳空山聞一尊臨風寫肝肺掉
頭晞髮滄江濱東南壇坫久寥落翁也追步前賢塵况復
小阮最清發謂薊洲共拍銅斗忘昏晨我雖曹鄴附庸國
願作東道通齊秦窮愁歲歲祝長健苜蓿豈厭荒厨貧請
翁入社執牛耳一笑大醉辛盤春

寄京師友人

鷓鴣英姿迥出羣一聲清切禁垣聞求言前席 恩光近
待漏中宵諫草焚見說廟謨咨汲黯豈因吏議譴朱雲諸
公侍從嫺文學慚愧人誇翰墨勲

懷汪厚夫太守

故人東海上風雨憶淮南
眠食慰無恙清狂性共諧
宦情中歲澹道味一生耽
寥落應憐我詩成孰細參

淮陰歲暮

城樓鼓角夜嘶風盼斷天南數點鴻
長劔十年餘故我衰齡半百已成翁
馬卿嬾病文難買阮籍踈狂路易窮
不盡蒼茫生百感苦吟寒坐一燈紅

秃樹巢禽凍不飛拂簷濃雪自霏霏
詩心已共冬心瘦風力還欺酒力微
有客吹竽爭聒耳何人垂釣學忘機
但須飽喫殘年飯塵事休談是與非

蘊愔閣詩集卷弟十二

男徵璵校字

後序

吾師婁東盛子履先生秉鐸吾邑之二載以所著蘊愔閣詩集屬肇祁校讐將以壽諸梨棗先生於學無所不窺上下今古源流畢貫其爲詩激盪靈闕陽開陰闔如神劍之鋒萬辟千灌如唐弓之體參均九和當今海內之士皆知先生爲真詩人固無俟肇祁之贅述也先生風骨峻卓窮且益堅嚴於擇交落落寡合獨至引獎後進不遺餘力往歲肇祁以詩進質辱見稱賞謂其有志於古不隨時俗且言作詩之旨務在讀書明理陶淑情性而不可有一毫世俗之見存於胸中肇祁雖才質駑鈍聞先生言敬志之不敢忘茲因按先生詩而附綴數語於卷末讀先生詩可以

知先生之爲人矣

道光元年歲在辛巳仲冬望日山陽受業許肇祁謹識



